

史

記

二二



廉頗藺相如列傳第二十一 史記八十一

廉頗者趙之良將也趙惠文王十六年廉頗為

趙將伐齊大破之取晉陽索隱曰陽晉衛地後屬齊今趙取之司馬彪郡國志

曰今衛國陽晉城是也有本作晉陽非也晉陽在太原雖亦趙地非齊所取也○正義曰故城在曹州乘氏縣西北四十

七里拜為上卿以勇氣聞於諸侯藺相如者趙

人也為趙宦者令繆賢舍人趙惠文王時得楚

和氏璧秦昭王聞之使人遺趙王書願以十五

城請易璧趙王與大將軍廉頗諸大臣謀欲予

秦秦城恐不可得徒見欺欲勿予即患秦兵之

來計未定求人可使報秦者未得宦者令繆賢

曰臣舍人藺相如可使王問何以知之對曰臣嘗有罪竊計欲亡走燕臣舍人相如止臣曰君何以知燕王臣語曰臣嘗從大王與燕王會境上燕王私握臣手曰願結友以此知之故欲往相如謂臣曰夫趙彊而燕弱而君幸於趙王故燕王欲結於君今君乃亡趙走燕畏趙其勢必不敢留君而東君歸趙矣君不如肉袒伏斧質請罪則幸得脫矣臣從其計大王亦幸赦臣臣竊以爲其人勇士有智謀宜可使於是王召見問藺相如曰秦王以十五城請易寡人之璧

可予不相如曰秦彊而趙弱不可不許王曰取  
吾璧不予我城奈何相如曰秦以城求璧而趙  
不許曲在趙趙予璧而秦不予趙城曲在秦均  
之二策寧許以負秦曲王曰誰可使者相如曰  
王必無人臣願奉璧往使城入趙而璧留秦城  
不入臣請完璧歸趙趙王於是遂遣相如奉璧  
西入秦秦王坐章臺見相如相如奉璧奏秦王  
秦王大喜傳以示美人及左右左右皆呼萬歲  
相如視秦王無意償趙城乃前曰璧有瑕請指  
示王王授璧相如因持璧却立倚柱怒髮上衝

冠謂秦王曰大王欲得璧使人發書至趙王趙王悉召羣臣議皆曰秦貪負其疆以空言求璧償城恐不可得議不欲予秦璧臣以爲布衣之交尚不相欺況大國乎且以一璧之故逆疆秦之驩不可於是趙王乃齋戒五日使臣秦璧拜送書於庭何者嚴大國之威以脩敬也今臣至大王見臣列觀禮節甚倨得璧傳之美人以戲弄臣臣觀大王無意償趙王城邑故臣復取璧大王必欲急臣臣頭今與璧俱碎於柱矣相如持其璧睨柱欲以擊柱秦王恐其破璧乃辭謝

固請召有司案圖指從此以往十五都予趙相  
如度秦王特以詐佯為予趙城實不可得乃謂  
秦王曰和氏璧天下所共傳寶也趙王恐不敢  
不獻趙王送璧時齋戒五日今大王亦宜齋戒

五日設九賓於廷

韋昭曰九賓則周禮九儀○索隱曰周禮大行人別九賓謂九服之賓客

也列士傳云設九牢也○正義曰劉伯莊云九賓者周王備之禮天子臨軒九服同會秦趙何得九賓但亦陳設車輅文

耳臣乃敢上璧秦王度之終不可彊奪遂許齋

五日舍相如廣成傳舍

索隱曰廣成是傳舍之名傳音張戀反

相如

度秦王雖齋決負約不償城乃使其從者衣褐

懷其璧從徑道亡歸璧于趙秦王齋五日後乃

設九賓禮於廷引趙使者藺相如相如至謂秦  
王曰秦自繆公以來二十餘君未嘗有堅明約  
束者也臣誠恐見欺於王而負趙故令人持璧  
歸間至趙矣且秦疆而趙弱大王遣一介之使  
至趙趙立秦璧來今以秦之疆而先割十五都  
予趙趙豈敢留璧而得罪於大王乎臣知欺大  
王之罪當誅臣請就湯鑊唯大王與羣臣孰計  
議之秦王與羣臣相視而嘻索隱曰音希嘻苦乃  
驚而怒之辭也左  
右或欲引相如去秦王因曰今殺相如終不能  
得璧也而絕秦趙之驩不如因而厚遇之使歸

趙趙王豈以一璧之故欺秦邪卒廷見相如畢  
禮而歸之相如既歸趙王以為賢大夫使不辱  
於諸侯拜相如為上大夫秦亦不以城予趙趙  
亦終不予秦璧其後秦伐趙拔石城

索隱曰劉氏云蓋謂石邑也。正義曰明年復攻趙殺

二萬人秦王使使者告趙王欲與王為好會於

西河外滹池

索隱曰在西河之南故云外按表在趙惠文王二十年

趙王畏秦

欲毋行廉頗藺相如計曰王不行示趙弱且怯

也趙王遂行相如從廉頗送至境與王訣曰王

行度道里會遇之禮畢還不過三十日二十日



不還則請立太子為王以絕秦望王許之遂與

秦王會澠池徐廣曰二十一年秦王飲酒酣曰寡人竊聞

趙王好音請奏瑟趙王鼓瑟秦御史前書曰某

年月日秦王與趙王會飲令趙王鼓瑟藺相如

前曰趙王竊聞秦王善為秦聲請奉盆缶秦王

以相娛樂風俗通義曰缶者瓦器所以盛酒漿秦人鼓之以節歌也○系隱曰缶音缶○正義曰缶音餅

秦王怒不許於是相如前進缶因跪請秦王秦

王不肯擊缶相如曰五步之內相如請得以頸

血澆大王矣正義曰澆音贊左右欲刃相如相如張目叱

之左右皆靡於是秦王不懌為一擊缶相如顧

廉頗藺相如傳

召趙御史書曰某年月日秦王為趙王擊甌秦之羣臣曰請以趙十五城為秦王壽藺相如亦曰請以秦之咸陽為趙王壽秦王竟酒終不能加勝於趙趙亦盛設兵以待秦秦不敢動既罷歸國以相如功大拜為上卿位在廉頗之右索隱曰王劭按董勛荅禮曰職高者名錄在上於人為右職卑者名錄在下於人為左是以謂下遷為左○正義曰秦漢以前

用右為上

廉頗曰我為趙將有攻城野戰之大功而

藺相如徒以口舌為勞而位居我上且相如素

賤人吾羞不忍為之下宣言曰我見相如必辱

之相如聞不肯與會相如每朝時常稱病不欲

與廉頗爭列已而相如出望見廉頗相如引車  
避匿於是舍人相與諫曰臣所以去親戚而事  
君者徒慕君之高義也今君與廉頗同列廉君  
宜惡言而君畏匿之恐懼殊甚且庸人尚羞之  
況於將相乎臣等不肖請辭去藺相如固止之  
曰公之視廉將軍孰與秦王曰不若也相如曰  
夫以秦王之威而相如廷叱之辱其羣臣相如  
雖驚獨畏廉將軍哉顧吾念之彊秦之所以不  
敢加兵於趙者徒以吾兩人在也今兩虎共鬪  
其勢不俱生吾所以爲此者以先國家之急而

後私讎也廉頗聞之肉袒負荆

索隱曰肉袒者謂袒衣而露肉也負

荆者荆楚也

因賓客至藺相如門謝罪曰鄙賤之

人不知將軍寬之至此也卒相與驩為刎頸之

交

索隱曰崔浩云要齊生死而刎頸無悔也

是歲廉頗東攻齊破其一

軍居二年廉頗復伐齊幾拔之

徐廣曰幾邑名也案趙世家惠文王

二十三年頗將攻魏之幾邑取之而齊世家及年表無伐齊

幾拔之事疑幾是邑名而或屬齊或屬魏耳田單在齊不得

至於拔也○索隱曰世家與此列傳合而戰國策云秦敗闕與反攻魏幾是幾亦屬魏故裴駙云或屬齊屬魏也○正義

曰幾音祈在相路之間後二年廉頗攻魏之防陵

徐廣曰一作防陵字誤也

○正義曰城在相州安陽縣南二十里因防水為名

安

陽拔之後四年藺相如將而攻齊至平邑而罷

正義曰故城在魏州  
昌樂縣東北二十里其明年趙奢破秦軍闕與下

趙奢者趙之田部吏也收租稅而平原君家不肯出趙奢以法治之殺平原君用事者九人平原君怒將殺奢奢因說曰君於趙爲貴公子今縱君家而不奉公則法削法削則國弱國弱則諸侯加兵諸侯加兵是無趙也君安得有此富乎以君之貴奉公如法則上下平上下平則國彊國彊則趙固而君爲貴戚豈輕於天下邪平原君以爲賢言之於王王用之治國賦國賦太平民富而府庫實秦伐韓軍於闕與王召廉頗

而問曰可救不對曰道遠險狹難救又召樂乘而問焉樂乘對如廉頗言又召問趙奢奢對曰其道遠險狹譬之猶兩鼠鬪於穴中將勇者勝王乃令趙奢將救之兵去邯鄲三十里而令軍中曰有以軍事諫者死秦軍軍武安西

徐廣曰屬魏郡在邯

鄲

秦軍鼓譟勒兵武安屋瓦盡振軍中候有一

人言急救武安趙奢立斬之堅壁留二十八日

不行復益增壘秦間來入趙奢善食而遣之間

以報秦將秦將大喜曰夫去國三十里

正義我曰國謂邯鄲趙

也而軍不行乃增壘闕與非趙地也趙奢既已

遣秦間乃卷甲而趨之二日一夜至今善射者  
去闕與五十里而軍軍壘成秦人聞之悉甲而  
至軍士許歷請以軍事諫趙奢曰內之許歷曰  
秦人不意趙師至此其來氣盛將軍必厚集其  
陣以待之不然必敗趙奢曰請受令許歷曰請  
就鈇質之誅趙奢曰胥後令索隱曰按胥須古人通  
用今者胥後令謂胥爲  
須須者待也待後令謂許歷之言更不擬誅之故更待後令  
也○正義曰胥猶須也軍去城都二十里而不行未有計過  
險陝恐人諫令急救武安乃出此令今垂  
戰須得謀策不用前令故云須後令也

邯鄲許歷復

請諫

索隱曰邯鄲二字當爲欲戰謂臨戰之時許歷復諫  
也王粲詩云許歷爲完士一言猶敗秦是言趙奢用

其計遂破秦軍也江遂曰漢令稱完  
而不髡曰耐是完士未免從軍也

曰先據北山上者

廉頗藺相如傳

勝

正義曰闕與山在洛州武安縣西南五十里趙奢距秦軍於闕與即此山也按括地志云言拒秦軍在此山疑其太近洛州既去邯鄲三十里而軍又云趨之二日一夜至闕與五十里而軍壘成據今洛州去潞州三百里間而隔相

州恐潞州闕與聚城是所拒據題後至者敗趙奢許諾即發萬人

趨之秦兵後至爭山不得上趙奢縱兵擊之大

破秦軍秦軍解而走遂解闕與之圍而歸趙惠

文王賜奢號為馬服君以許歷為國尉趙奢於

是與廉頗藺相如同位後四年趙惠文王卒子

孝成王立七年秦與趙兵相距長平時趙奢已

死

張華曰趙奢家在邯鄲界西山上謂之馬服山而藺相如病篤趙使廉

頗將攻秦秦數敗趙軍趙軍固壁不戰秦數挑



戰廉頗不肯趙王信秦之間秦之間言曰秦之所惡獨畏馬服君趙奢之子趙括爲將耳趙王因以括爲將代廉頗藺相如曰王以名使括若膠柱而鼓瑟耳括徒能讀其父書傳不知合變也趙王不聽遂將之趙括自少時學兵法言兵事以天下莫能當嘗與其父奢言兵事奢不能難然不謂善括母問奢其故奢曰兵死地也而括易言之使趙不將括即已若必將之破趙軍者必括也及括將行其母上書言於王曰括不可使將王曰何以對曰始妾事其父時爲將身

所奉飯飲而進食者以十數

正義曰奉音捧

所友者以

百數大王及宗室所賞賜者盡以予軍吏士大夫受命之日不問家事今括一旦爲將東向而朝軍吏無敢仰視之者王所賜金帛歸藏於家而日視便利田宅可買者買之王以爲何如其父父子異心願王勿遣王曰毋置之吾已決矣括母因曰王終遣之即有如不稱妾得無隨坐乎王許諾趙括旣代廉頗悉更約束易置軍吏秦將白起聞之縱奇兵佯敗走而絕其糧道分斷其軍爲二士卒離心四十餘日軍餓趙括出

銳卒自搏戰秦軍射殺趙括括軍敗數十萬之  
衆遂降秦秦悉阬之趙前後所亡凡四十五萬  
明年秦兵遂圍邯鄲歲餘幾不得脫賴楚魏諸  
侯來救乃得解邯鄲之圍趙王亦以括母先言  
竟不誅也自邯鄲圍解五年而燕用栗腹之謀  
曰趙壯者盡於長平其孤未壯舉兵擊趙趙使  
廉頗將擊大破燕軍於鄒殺栗腹遂圍燕燕割  
五城請和乃聽之趙以尉文徐廣曰邑名也封廉頗爲  
信平君索隱曰信平号也徐廣云尉文邑名按漢書表有尉文節侯云在南郡蓋尉官也文名也謂取尉文  
所食之邑復以封頗而号爲信平君也爲假相國廉頗之免長平歸也

廉頗藺相如

失勢之時故客盡去及復用為將客又復至廉  
頗曰客退矣客曰吁君何見之晚也夫天下以  
市道交君有勢我則從君君無勢則去此固其  
理也有何怨乎居六年趙使廉頗伐魏之繁陽

徐廣曰屬魏郡○正義曰在相州內黃縣東北也

拔之趙孝成王卒子悼襄

王立使樂乘代廉頗廉頗怒攻樂乘樂乘走廉  
頗遂奔魏之大梁其明年趙乃以李牧為將而

攻燕拔武遂方城

索隱曰地理志武遂屬河間國方城屬屬廣陽也○正義曰武遂易州遂城

也方城幽州固安縣南十里

廉頗居梁久之魏不能信用趙以

數困於秦兵趙王思復得廉頗廉頗亦思復用

於趙趙王使使者視廉頗尚可用否廉頗之仇  
郭開多與使者金令毀之趙使者既見廉頗廉  
頗爲之一飯斗米肉十斤被甲上馬以示尚可  
用趙使還報王曰廉將軍雖老尚善飯然與臣  
坐頃之三遺矢矣索隱曰謂數起便也矢一作屎趙王以爲老遂  
不召楚聞廉頗在魏陰使人迎之廉頗一爲楚  
將無功曰我思用趙人廉頗卒死于壽春正義曰廉

頗墓在壽州壽春縣北四里  
蘭相如墓在邯鄲西南六里

李牧者趙之北邊良將也常居代鴈門備匈奴  
正義曰今鴈門縣在  
代地故云鴈門也以便宜置吏市租皆輸入莫府

廉頗蘭相如

如淳曰將軍征行無常處所在為治故言莫府莫大也○索隱曰如淳解莫為大非也崔浩云古者出征為將帥軍還則罷理無常處以幕帟為府署故曰莫府則莫當作幕字之誤也為士卒費日擊數牛

饗士習射騎謹烽火多間謀索隱曰上紀覓反下音牒厚遇

戰士為約曰匈奴即入盜急入收保有敢捕虜者斬匈奴每入烽火謹輒入收保不敢戰如是

數歲亦不亡失然匈奴以李牧為怯雖趙邊兵

亦以為吾將怯趙王讓李牧李牧如故趙王怒

召之使他人代將歲餘匈奴每來出戰出戰數

不利失亡多邊不得田畜正義曰許又反復請李牧牧

杜門不出固稱疾趙王乃復彊起使將兵牧曰

王必用臣臣如前乃敢奉令王許之李牧至如

故約匈奴數歲無所得終以為怯邊士日得賞

賜而不用皆願一戰於是乃具選車得千三百

乘選騎得萬三千匹百金之士五萬人管子曰能破敵擒將

者賞百金穀者十萬人索隱曰穀音古候反穀謂能射也悉勒習戰大

縱畜牧人民滿野匈奴小入佯北不勝以數千

人委之索隱曰委謂弃之恣其殺略也單于聞之大率眾來入李

牧多為奇陳張左右翼擊之大破殺匈奴十餘

萬騎滅襜褕襜都甘反襜路談反徐廣曰一作臨駟又案如淳曰胡名也在代地破東胡降

林胡單于奔走其後十餘歲匈奴不敢近趙邊

康頰藺相如

城趙悼襄王元年廉頗既亡入魏趙使李牧攻

燕拔武遂方城居二年龐煖破燕軍殺劇辛索隱

曰煖即馮煖也龐音皮江反煖音况遠反又音喧劇辛本趙人仕燕者後七年秦破趙殺

將扈輒於武遂城索隱曰扈氏輒名漢張耳時別有扈輒也劉氏云武遂本韓地在趙西恐

非地理志河間武遂也斬首十萬趙乃以李牧為大將軍擊

秦軍於宜安正義曰在相州豪城縣西南二十里大破秦軍走秦將

栢齟索隱曰齟音蟻封李牧為武安君居二年秦攻番

吾索隱曰縣名地理志在常山音婆又音盤正義曰在相州房山縣東二十里也李牧擊破

秦軍南距韓魏趙王遷七年秦使王翦攻趙趙

使李牧司馬尚禦之秦多與趙王寵臣郭開金



爲反聞言李牧司馬尚欲反趙王乃使趙葱及  
齊將顏聚代李牧李牧不受命趙使人微捕得  
李牧斬之廢司馬尚後三月王翦因急擊趙大  
破殺趙葱虜趙王遷及其將顏聚遂滅趙

太史公曰知死必勇非死者難也處死者難方

藺相如引璧睨柱及叱秦王左右勢不過誅然

士或怯懦徐廣曰一作掘懦而不敢發相如一奮其氣威

信敵國索隱曰信音申退而讓頗名重太山其處智勇可

謂兼之矣

索隱述贊曰

廉頗藺相如

清飈凜凜 壯氣熊熊 各竭誠義  
逆爲雌雄 和璧聘返 澗池好通  
負荆知懼 屈節推工 安邊定策  
頗牧之功

廉頗閻相如列傳第二十一 史記八十一



田單列傳第二十二

史記八十二

田單者齊諸田疏屬也

索隱曰單音丹

湣王時單為臨

菑市掾不見知及燕使樂毅伐破齊齊湣王出

奔已而保莒城燕師長驅平齊而田單走安平

徐廣曰今之東安平也在青州臨菑縣東十九里古紀之鄆邑齊改為安平秦滅齊改為東安平縣屬齊郡以定州有安平故加東字○索隱曰地

理志東安平屬淄川國

令其宗人盡斷其車軸末

而傅鐵籠

徐廣曰傅音附○索隱曰斷音都緩反斷其軸恐長相撥也以鐵裹軸頭堅而易進也傳

者截其軸與轂齊以鐵鑠附軸末施轄於鐵中以制轂也又方言曰車轄齊謂之籠郭璞云車軸也

已而燕

軍攻安平城壞齊人走爭塗以轄折車敗

徐廣曰轄

車軸頭也音衛

為燕所虜唯田單宗人以鐵籠故得脫

東保即墨燕既盡降齊城唯獨莒即墨不下燕  
軍聞齊王在莒并兵攻之淖齒徐廣曰多  
作淖齒也既殺  
湣王於莒因堅守距燕軍數年不下燕引兵東  
圍即墨即墨大夫出與戰敗死城中相與推田  
單曰安平之戰田單宗人以鐵籠得全習兵立  
以爲將軍以即墨距燕頃之燕昭王卒惠王立  
與樂毅有隙田單聞之乃縱反間於燕宣言曰  
齊王已死城之不拔者二耳樂毅畏誅而不敢  
歸以伐齊爲名實欲連兵南面而王齊齊人未  
附故且緩攻即墨以待其事齊人所懼唯恐他

將之來即墨殘矣燕主以爲然使騎劫代樂毅  
樂毅因歸趙燕人士卒忿而田單乃令城中人  
食必祭其先祖於庭飛鳥悉翔舞城中下食燕  
人怪之田單因宣言曰神來下教我乃令城中  
人曰當有神人爲我師有一卒曰臣可以爲  
師乎因反走田單乃起引還東鄉坐師事之卒  
曰臣欺君誠無能也田單曰子勿言也因師之  
每出約束必稱神師乃宣言曰吾唯懼燕軍之  
剽所得齊卒置之前行正義曰故即反與我戰即墨敗  
矣燕人聞之如其言城中人見齊諸降者盡剽

皆怒堅守唯恐見得單又縱反間曰吾懼燕人  
掘吾城外冢墓僂先人可爲寒心燕軍盡掘龍  
墓燒死人即墨人從城上望見皆涕泣其欲出  
戰怒自十倍田單知士卒之可用乃身操版插  
於行伍之間盡散飲食饗士令甲卒皆伏使老  
弱女子乘城遣使約降於燕燕軍皆呼萬歲田  
單又收民金得千溢令即墨富豪遺燕將曰即  
墨即降願無虜掠吾族家妻妾令安堵燕將大  
喜許之燕軍由此益懈田單乃收城中得千餘

索隱曰操音七高反插音初洽反  
正義曰古之軍行常負板插也

與士卒分功妻妾編

牛爲絳繒衣畫以五彩龍文束兵刃於其角而  
灌脂束葦於尾燒其端燬金城數十穴夜縱牛壯  
士五千人隨其後牛尾執怒而奔燕軍燕軍夜  
大驚牛尾炬火光明炫耀燕軍視之皆龍文所  
觸盡死傷五千人因街枚擊之而城中鼓譟從  
之老弱皆擊銅器爲聲聲動天地燕軍大駭敗  
走齊人遂夷殺其將騎劫燕軍擾亂奔走齊人  
追亡逐北所過城邑皆畔燕而歸田單兵日益  
多乘勝燕日敗亡卒至河上

索隱曰燕之北界近  
河東蓋齊舊地也

齊七十餘城皆復爲齊乃迎襄王於莒入臨菑



而聽政襄王封田單號曰安平君索隱曰單初起安平故以為號

太史公曰兵以正合以奇勝魏武帝曰先出合戰為正後出為奇也正者當

敵奇兵擊不備索隱曰奇謂權詠也注引魏武蓋亦軍令也善之者出奇無窮索隱

曰兵不厭詐故云善之出奇無窮謂權變多也奇正還相生正義曰當猶合也言正兵當陣張左右翼

掩其不備則奇正合敗敵也如環之無端索隱曰言用兵之術或用奇計使前敵不可測量如

尋環中不知端倪也夫始如處女適人開戶徐廣曰適音敵索隱曰言兵始如處女

之軟弱則敵人輕侮開戶不為備正義曰敵人謂燕軍也言燕軍被田單反間易將及被卒燒壘墓而令齊卒甚怒是

敵人為單開門戶也後如脫兔適不及距魏武帝曰如女示弱脫兔往疾也索隱

曰克捷之後卷甲而趨有如兔之得脫而疾走其田單之

也敵不及距者若脫兔忽過而敵忘其所距也謂邪初悼齒之殺湣王也莒人求湣王子法章

田單傳

得之太史燉之家

正義燉音皎

為人灌園燉女憐而

善遇之後法章私以情告女女遂與通及莒人

共立法章為齊王以莒距燕而太史氏女遂為

后所謂君王后也燕之初入齊聞畫邑人

劉熙曰齊

西南近邑畫音獲○索隱曰音胡卦反○正義曰括地志云

戟里城在臨淄西北三十里春秋時棘邑又云畫邑蠋所居

即此邑因畫水為名也

王蠋賢索隱曰蠋音觸亦音歎令軍中曰環畫邑

三十里無入以王蠋之故已而使人謂蠋曰齊

人多高子之義吾以子為將封子萬家蠋固謝

燕人曰子不聽吾引三軍而屠畫邑王蠋曰忠

臣不事二君貞女不更二夫齊王不聽吾諫故

退而耕於野國既破亡吾不能存今又劫之以  
兵為君將是助桀為暴也與其生而無義固不  
如亨遂經其頸於樹枝自奮絕脰而死索隱曰經猶繫也何休云脰頸齊  
齊亡大夫聞之曰王蠋布衣也義不  
北面於燕況在位食祿者乎乃相聚如莒求諸  
子立為襄王

索隱述贊曰

軍法以正

實尚奇兵

斷軸自免

反間先行

羣鳥惑眾

五牛揚旌

卒破騎劫

皆復齊城

襄王嗣位

乃封安平

田單列傳第二十二

史記八十二



魯仲連鄒陽列傳第二十三 史記八十三

索隱曰魯連屈原當六國之時賈誼鄒陽在文  
景之日事迹雖復相類年代甚為乖絕其鄒陽  
不可上同魯連賈生亦不可下同屈原宜抽魯  
連同田單為傳其屈原與宋玉等為一傳其鄒

陽與枚乘賈  
生等同傳

魯仲連者齊人也好奇偉倣儻之畫策索隱曰賈雅云

倣儻卓異也○正義曰倣天曆反魯連子云齊辯士田巴服  
狙丘議稷下毀五帝罪三王服五伯離堅白合同異一日服  
千人有徐劫者其弟子曰魯仲連年十二號千里駒往請田  
巴曰呂聞堂上不奮郊草不芸白刃交前不救流矢急不暇  
緩也今楚軍南陽趙伐高唐燕人十萬聊城不去國亡在旦  
夕先生奈之何若不能者先生之言有似梟鳴出城而人惡  
之願先生勿復言田巴曰謹聞命矣巴謂徐劫  
曰先生乃飛兔也豈直千里駒巴終身不談

官任職好持高節游於趙趙孝成王時而秦王

而不肯仕

使白起破趙長平之軍前後四十餘萬秦兵遂

東圍邯鄲趙王恐諸侯之救兵莫敢擊秦軍魏

安釐王使將軍晉鄙救趙畏秦止於蕩陰不進

地理志河內有蕩陰縣○正義曰蕩天郎反相州縣魏王使客將軍新垣衍間

入邯鄲索隱曰新垣姓衍名也為梁將故漢有新垣平因平原君謂趙王曰

秦所為急圍趙者前與齊湣王爭疆為帝已而

復歸帝今齊湣王已益弱方今唯秦雄天下此

非必貪邯鄲其意欲復求為帝趙誠發使尊秦

昭王為帝秦必喜罷兵去平原君猶預未有所

決此時魯仲連適游趙會秦圍趙聞魏將欲令

魯仲連鄒陽傳

趙尊秦為帝乃見平原君曰事將奈何平原君曰勝也何敢言事前亡四十萬之眾於外今又內圍邯鄲而不能去魏王使客將軍新垣衍令

趙帝秦

索隱曰新垣衍欲令趙尊秦為帝

今其人在是勝也何敢

言事魯仲連曰吾始以君為天下之賢公子也

吾乃今然後知君非天下之賢公子也梁客新

垣衍安在吾請為君責而歸之平原君曰勝請

為紹介

郭璞曰紹介相佑助者○索隱曰紹介猶媒介也且禮賓至必因介以傳辭紹者繼也介不一人故

禮云介紹而傳命

而見之於先生平原君遂見新垣衍曰

東國有魯仲連先生者今其人在此勝請為紹



介交之於將軍新垣衍曰吾聞魯仲連先生齊國之高士也衍人臣也使事有職吾不願見魯仲連先生平原君曰勝既已泄之矣新垣衍許諾魯仲連見新垣衍而無言新垣衍曰吾視居此圍城之中者皆有求於平原君者也今吾觀先生之玉貌非有求於平原君者也曷為久居此圍城之中而不去魯仲連曰世以鮑焦為無從頌而死者皆非也

鮑焦周之介士也見莊子○索隱曰從頌音從容言世見鮑焦之死比皆以為不能自寬容而取死此言非也○正義曰韓詩外傳云姓鮑名焦周時隱者也飾行非世廉潔而守荷擔採樵拾橡充食故無子胤不臣天子不友諸侯子真遇之謂之曰吾聞非其政者不履其土汗其君者不受其利今子履其地食其

利其可乎鮑焦曰吾聞廉士重進而輕退賢人易愧而  
輕死遂抱木立枯焉按魯仲連留趙不去者非為一身衆

人不知則為一身索隱曰言衆人不識鮑焦之意焦以  
耻居濁世而避之非是自為一身而

憂死彼秦者弃禮義而上首功之國也譙周曰秦用  
衛鞅計制爵

二十等以戰獲首級者計而受爵是以秦人每戰勝老弱婦  
人皆死計功賞至万數天下謂之上首功之國皆以惡之也

○索隱曰秦法斬首多為上功謂斬一權使其士虜使  
人首賜爵一級故謂秦為首功之國也

其民索隱曰言秦人以權詐使其戰士  
以奴虜使其人民言无恩以恤下彼即肆然而

為帝過正義曰至過字為絕句肆然其志意也言秦得肆  
志為帝恐有烹醢納莞徧行天子之禮過失也

而為政於天下索隱曰謂以過惡而為政也○正義曰  
若趙魏帝秦得行政教於天下曾連蹈

東海而溺死不則連有蹈東海而死耳吾不忍為  
忍為秦百姓

之民也所為見將軍者欲以助趙也新垣衍曰

先生助之將奈何魯連曰吾將使梁及燕助之  
齊楚則固助之矣新垣衍曰燕則吾請以從矣  
若乃梁者則吾乃梁人也先生惡能使梁助之  
魯連曰梁未睹秦稱帝之害故耳使梁睹秦稱  
帝之害則必助趙矣新垣衍曰秦稱帝之害何  
如魯連曰昔者齊威王嘗為仁義矣率天下諸  
侯而朝周周貧且微諸侯莫朝而齊獨朝之居  
歲餘周烈王崩徐廣曰烈王七年崩威王之十年○正義曰周本紀及年表云烈王七年崩齊  
威之十年也與徐不同齊後往周怒赴於齊正義曰鄭玄云赴告也今文赴作計  
曰天崩地坼天子下席索隱曰謂烈王太子安王驕也下席言其寢苦居廬也

東藩之臣因齊後至則斮

公羊傳曰斮三軍者其法斮何休曰斮斬也

齊

威王勃然怒曰叱嗟而毋婢也

正義曰罵

卒為天

下笑故生則朝周死則叱之誠不忍其求也彼

天子固然其無足怪新垣衍曰先生獨不見夫

僕乎十人而從一人者寧力不勝而智不若邪

畏之也

索隱曰言僕夫十人而從一人者寧是力不勝亦非智不如正是畏懼其王耳

魯仲連

曰嗚呼梁之比於秦若僕邪新垣衍曰然魯仲

連曰吾將使秦王享醢梁王新垣衍怏然不悅

曰

正義曰怏於尚反

噫嘻

索隱曰上音依噫者不平之聲下音希嘻者驚恨之歎也

亦太甚

矣先生之言也先生又惡能使秦王享醢梁王

魯仲連曰固也吾將言之昔者九侯鄂侯徐廣曰鄂

縣有九侯城九一作鬼鄂一作邢○正義曰九侯城在相州盜陽縣西南五十里文王紂之三

公也九侯有子而好獻之於紂紂以為惡醢九

侯鄂侯爭之彊辯之疾故脯鄂侯文王聞之喟

然而歎故拘之牖里之庫百日正義曰相州蕩陰縣北九里有姜城

欲令之死曷為與人俱稱王卒就脯醢之地齊

湣王將之魯夷維子為執策而從索隱曰維東萊之邑其居夷也

號夷維子故晏子為萊之夷維人是也○正義曰密州高密縣古夷安城應劭云故萊夷維邑也蓋因邑為姓子者男子

之美號又云子爵也謂魯人曰子將何以待吾君魯人曰吾

將以十太牢待子之君夷維子曰子安取禮而

魯仲連鄒陽傳

來吾君彼吾君者天子也天子巡狩諸侯辟舍

索隱曰辟舍避正寢案禮天子適諸侯必舍於祖廟

納莞籥

索隱曰音管藥

攝衽抱机

義曰衽音而其反

視膳於堂下天子已食乃退而

聽朝也魯人投其籥不果納

索隱曰謂閉外門不入齊君○正義曰籥即鑰

匙也投鑰匙於地

不得入於魯將之薛

正義曰薛侯故城在徐州滕縣界也

假

途於鄒當是時鄒君死潛王欲入弔夷維子謂

鄒之孤曰天子弔主人必將倍殯棺設北面於

南方然後天子南面弔也

索隱曰倍音佩謂主人不在殯東將背其殯棺立西

階上北面哭是倍也天子乃於阼階上南面而弔之也

鄒之羣臣曰必若此吾

將伏劔而死固不敢入於鄒鄒魯之臣生則不

得事養死則不得賻綵

正義曰衣服曰綵貨財曰賻皆助生送死之禮

然

且欲行天子之禮於鄒魯鄒魯之臣不果納

索隱

曰謂時君弱臣彊故鄒魯君生時臣並不得盡事養死亦不得行賻綵之禮然齊欲行天子禮於鄒魯鄒魯之臣皆不果

納之是猶秉禮而存大體也

今秦萬乘之國也梁亦萬乘之國

也俱據萬乘之國各有稱王之名睹其一戰而

勝欲從而帝之是使三晉之大臣不如鄒魯之

僕妾也且秦無已而帝則且變易諸侯之大臣

彼將奪其所不肖而與其所賢奪其所憎而與

其所愛彼又將使其子女讒妾為諸侯妃姬處

梁之宮梁王安得晏然而已乎而將軍又何以

魯仲連鄒陽傳

得故寵乎於是新垣衍起再拜謝曰始以先生  
爲庸人吾乃今日知先生爲天下之士也吾請  
出不敢復言帝秦秦將聞之爲却軍五十里適  
會魏公子無忌奪晉鄙軍以救趙擊秦軍秦軍  
遂引而去於是平原君欲封魯連魯連辭讓使  
者三終不肯受平原君乃置酒酒酣起前以子  
金爲魯連壽魯連笑曰所謂貴於天下之士者  
爲人排患釋難解紛亂而無取也即有取者是  
商賈之事也而連不忍爲也遂辭平原君而去  
終身不復見其後二十餘年燕將攻下聊城

索隱



曰徐廣云年表以田單攻聊城在長平後十餘年耳二十餘年誤也。正義曰今博州縣也。聊城人或

讒之燕燕將懼誅因保守聊城不敢歸齊田單

攻聊城徐廣曰案年表田單攻聊城在長平後十餘年也歲餘士卒多死而

聊城不下魯連乃為書約之矢以射城中遺燕

將書曰吾聞之智者不倍時而弃利勇士不怯

死而滅名索隱曰怯死猶避死也忠臣不先身而後君今公

行一朝之忿不顧燕王之無臣非忠也殺身亡

聊城而威不信於齊非勇也功敗名滅後世無

稱焉非智也三者世主不臣說士不載故智者

不再計勇士不怯死今死生榮辱貴賤尊卑此

魯仲連鄒陽

時不再至願公詳計而無與俗同且楚攻齊之

南陽索隱曰即濟之淮北泗上之地也魏攻平陸索隱曰平陸邑名在西界○正義曰

兖州縣也而齊無南面之心以為亡南陽之害小不

如得濟北之利大索隱曰即聊城之地也○正義曰言齊無南面攻楚魏之心以為南陽平

陸之害小不如聊城之利大言必攻之故定計審處之今秦入下兵魏

不敢東面衡秦之勢成索隱曰此時秦與齊和故云衡秦之勢成也楚

國之形危齊奔南陽斷右壤定濟北索隱曰謂弃楚所攻之泗

上也又斷絕魏之所攻齊右壤之地平陸是也言右壤斷弃而不能救志在攻聊城而定濟北也計猶且

為之也且夫齊之必決於聊城公勿再計今楚

魏交退於齊而燕救不至索隱曰交者俱也前時楚攻南陽魏攻平陸今二國

之兵俱退而燕救以全齊之兵無天下之規與聊城

共據期年之敵則臣見公之不能得也且燕國

大亂君臣失計上下迷惑粟腹以十萬之眾五

折於外徐廣曰此事去長平十年以萬乘之國被圍於趙壤削

主困為天下僂笑國敵而禍多民無所歸心今

公又以敝聊之民距全齊之兵是墨翟之守也

正義曰如墨翟守宋却楚軍食人炊骨士無反外之心是孫臏

之兵也正義曰言孫臏能撫士卒士卒無二心能見於天下雖然為

公計者不如全車甲以報於燕車甲全而歸燕

燕王必喜身全而歸於國士民如見父母交游

魯仲連鄰陽傳

攘臂而議於世功業可明上輔孤主以制羣臣

下養百姓以貨說士索隱曰言既養百姓又貨說士終擬強國也劉氏云讀說士為說士

意雖便不如依字也矯國更俗索隱曰欲令燕將歸燕功名可立

也亡意亦指燕弃世東游於齊乎索隱曰亡音無言若必無還燕

意則指燕而東游於齊乎裂地定封富比乎陶衛索隱曰延篤注戰國策云陶陶

封陶商君姓備富比陶衛謂此云爾朱公也衛衛公子荆非也王劭云魏冉世世稱孤與齊

久存又一計也此兩計者顯名厚實也願公詳

計而審處一焉且吾聞之規小節者不能成榮

名惡小耻者不能立大功昔者管夷吾射桓公

中其鉤篡也遺公子糾不能死怯也索隱曰遺弃也謂弃子糾

而事小白也。○正義曰：管仲傳子糾而束縛桎梏辱也。魯殺之不能隨子糾死，是怯懦畏死也。

若此三行者，世主不臣而鄉里不通，鄉使管子

幽囚而不出身死而不反於齊，則亦名不免為

辱人賤行矣。臧獲且羞與之同名矣。方言曰：荆淮海岱燕齊之

間罵奴曰臧，罵婢曰獲。況世俗乎？故管子不耻身在縲紲之

中而恥天下之不治，不恥不死，公子糾而恥威

之不信於諸侯，故兼三行之過而為五霸首。正義

曰：按齊桓最初得周襄王賜文武肱彤弓矢，大輅故為五伯首也。名高天下而光燭鄰

國，曹子為魯將。索隱曰：曹昧。三戰三北而亡地五百

里，鄉使曹子計不反，顧議不還踵刎頸而死，則

亦名不免為敗軍禽將矣曹子棄三北之恥而退與曹君計桓公朝天下會諸侯曹子以一劍之任枝桓公之心於壇坫之上

索隱曰枝猶擬也

顏色

不變辭氣不悖三戰之所亡一朝而復之天下

震動諸侯驚駭威加吳越若此二士者非不能

成小廉而行小節也以為殺身亡軀絕世滅後

功名不立非智也故去感忿之怨立終身之名

棄忿情之節

正義曰忿數粉反情於緣反

定累世之功是以業

與三王爭流而名與天壤相弊也願公擇一而

行之燕將見魯連書位三日猶預不能自決欲

歸燕已有隙恐誅欲降齊所殺虜於齊甚衆恐  
已降而後見辱喟然歎曰與人刃我寧自刃乃  
自殺聊城亂田單遂屠聊城歸而言魯連欲爵  
之魯連逃隱於海上曰吾與富貴而詘於人寧  
貧賤而輕世肆志焉

索隱曰肆  
放縱也

鄒陽者齊人也游於梁與故吳人莊忌夫子淮

陰枚生之徒交上書

索隱曰忌會稽人姓莊氏字夫子  
後避漢明帝諱改姓曰嚴枚生名

乘字叔其子臯漢書並有  
傳蓋以街枚氏而得姓也

而介於羊勝公孫詭之間

索隱曰言鄒陽上書自達而游於二人之間或往彼  
或往此介者言有隔於其間故杜預曰介猶間也

勝等

嫉鄒陽惡之梁孝王孝王怒下之吏將欲殺之

鄒陽客游以讒見禽恐死而負累正義曰諸不以罪死為累

乃從獄中上書曰臣聞忠無不報信不見疑臣

常以為然徒虛語耳昔者荆軻慕燕丹之義白

虹貫日太子畏之應劭曰燕太子丹質於秦始皇遇之無禮丹亡去故厚養荆軻令西刺秦

王精誠感天白虹為之貫日也如淳曰白虹兵象日為君烈士傳曰荆軻發後太子自相氣見虹貫日不徹曰吾事不成

矣後聞軻死事不立曰吾知其然也○索隱曰王劭又云軻將入秦待其客未發太子丹疑其畏懼故曰畏之其解不如

見虹貫日不徹也戰國策云聶政刺韓僂亦曰白虹貫日是也衛先生為秦畫長平

之事太白蝕昴而昭王疑之蘇林曰白起為秦伐趙破長平軍欲遂滅趙遣

衛先生說昭王益兵糧乃為應侯所害事用不成其精誠上達於天故太白為之蝕昴昴趙分也將有兵故太白食昴食

干歷之也如淳曰太白乃天之將軍也○索隱曰如淳云太白主西方秦在西敗趙之兆也又王充云夫言白虹貫日太



白食昂實也言荆軻之謀衛先生夫精變天地而信不  
之策感動皇天而貫曰食昂虛也

喻兩主豈不哀哉今臣盡忠竭誠畢議願知張晏

曰盡其計議願王知之也左右不明索隱曰言左右之卒從吏訊

為世所疑是使荆軻衛先生復起而燕秦不悟

也願大王孰察之昔卞和獻寶楚王刑之應劭曰卞

和得玉璞獻之武王武王示玉人玉人曰石也刑右足武王沒復獻文王玉人復曰石也刑其左足至成王時卞和抱璞

哭於郊乃使玉尹攻之果得寶玉○索隱曰楚人卞和得玉璞事見國語及呂氏春秋案世家楚武王名熊通文王名此貞

成王名悼李斯竭忠胡亥極刑是以箕子佯狂索隱曰佯

音陽謂詐為狂司馬彪曰箕子名曰胥餘接輿辟世張晏曰楚賢人佯狂辟世也○索隱曰案高士傳曰

楚人陸通字接輿是也恐遭此患也願大王孰察卞和李斯

魯仲連鄒陽傳

之意而後楚王胡亥之聽

索隱曰謂以楚王胡亥之聽為謬故後之而不用後

猶下也

無使臣為箕子接輿所笑臣聞比干剖心

子胥鴟夷

索隱曰韋昭云以皮作鴟鳥形名曰鴟夷鴟夷皮榼也服虔云用馬革作囊以裹尸投之於江

臣始不信乃今知之願大王孰察少加憐焉諺

曰有白頭如新傾蓋如故

桓譚新論曰言內有以相知與否不在新故也○索

隱曰服虔云人不相知才能交至白頭猶如新也傾蓋如故如吳札鄭僑也家語孔子遇程子於途傾蓋而語又志林云

傾蓋者道行相遇軒車對語兩蓋相切小敬之義故云傾蓋也何則知與不知也故

昔樊於期逃秦之燕藉荆軻首以奉丹之事

索隱

曰藉音子夜反韋昭云謂於期逃秦之燕以頭與軻使持入秦以示信也

王奢去齊之魏臨

城自剄以却齊而存魏

漢書音義曰王奢者齊人也亡至魏其後齊伐魏奢登城謂

齊將曰今君之來不過以奢之故也夫王奢樊於期非夫義不苟生以為魏累遂自剄也

新於齊秦而故於燕魏也所以去二國死兩君

者行合於志而慕義無窮也是以蘇秦不信於

天下而為燕尾生索隱曰服虔云蘇秦於秦不出其信於燕則出尾生之信韋昭云尾生守信而死者案言蘇秦於燕獨守信如尾生故云為燕之尾生也

白圭戰亡六城為魏

取中山張晏曰白圭為中山將亡六城君欲殺之亡入魏文侯厚遇之還按中山○索隱曰事見戰國策及

何則誠有以相知也蘇秦相燕燕人惡

之於王王按劍而怒食以馱馱漢書音義馱馱駢音馱馬也生七日而超

其母敬重蘇秦雖有讒謗而更膳以珍奇之味○索隱曰字林云馬父贏子比狄之良馬也○正義曰食音寺馱馱音快

白圭顯於中山中山人惡之魏文侯文侯

魯仲連鄰陽傳

投之以夜光之璧何則兩主二臣剖心折肝相信豈移於浮辭哉故女無美惡入宮見妬士無賢不肖入朝見嫉昔者司馬喜骸脚於宋卒相

中山晉灼曰司馬喜三相中山蘇林曰六國時人被范此刑也○索隱曰事見戰國策及呂氏春秋

睚眦脅折齒於魏卒為雁戾索隱曰雁戾傳作折脅摺齒是也說文云

拉摧也音力谷反此二人者皆信必然之畫捐朋黨之私

挾孤獨之位故不能自免於嫉妬之人也是以

申徒狄自沈於河漢書音義曰殷之末世人○索隱曰莊子申徒狄諫而不用負石自投於

河韋昭云六國時人漢書云自沈於雍河服虔云雍州之河也又新序作抱甕自沈於河不同也徐衍負

石入海列士傳曰周之末世人不容於世義不苟取比周於

朝以移主上之心故百里奚乞食於路繆公委

之以政甯戚飯牛車下而桓公任之以國應劭曰齊

桓公夜出迎客而甯戚疾擊其牛角商歌曰南山矸白石爛

生不遭堯與舜禪短布單衣適至胥從昏飯牛薄夜半長夜

曼曼何時旦公公與語說之以為大夫○索隱曰事見呂氏

春秋商歌者謂為商聲而歌也或云商旅人歌也二說並通

矸音公禪反矸者自淨兒也顧野王音岸禪音善如此二

字讀協韻失之也埤蒼云胥脛也字林音下諫反

人者豈借官於朝假譽於左右然後二主用之

哉感於心合於行親於膠漆昆弟不能離豈惑

於眾口哉故偏聽生姦獨任成亂昔者魯聽季

孫之說而逐孔子索隱曰論語齊人歸女樂季桓

信子罕之計而囚墨翟索隱曰左氏司城子罕姓樂

魯仲連鄒陽傳

名喜乃宋之賢臣也漢書作

宋

子冉不知子冉是何人文穎曰子冉子罕也荀卿傳云墨翟  
孔子時人或云在孔子後又襄二十九年左傳宋飢子罕請  
出粟時孔子適八歲則墨翟與子罕不得相輩或以子冉為是不知何如也  
夫以孔墨之辯

不能自免於讒諛而二國以危何則眾口鑠金

索隱曰國語云眾心成城眾口鑠金賈逵云鑠消也眾口所  
惡雖金亦為之消云又風俗通云或說有美金於此眾人或

共誣訛言其不純金賣者欲其必售同  
取鍛燒以見其真是為眾口鑠金也積毀銷骨也索

曰大頰云讒人積久譖毀則父  
兄自相誅戮骨肉為之消滅也是以秦用戎人由余

而霸中國齊用越人蒙而彊威宣索隱曰越人蒙  
未見所出漢書

作子臧又張晏云子  
臧或是越人蒙字也此二國豈拘於俗牽於世繫阿

偏之辭哉公聽並觀垂名當世索隱曰小頰云公聽  
言不私並觀謂所見

也故意合則胡越為昆弟由余越人蒙是矣不

合則骨肉出逐不收朱象管蔡是矣今人主誠

能用齊秦之義後宋魯之聽則五伯不足稱三

王易為也是以聖王覺寤捐子之心徐廣曰燕王讓國於

其大臣而能不說於田常之賢應劭曰田常事齊簡公簡公說之而

殺簡公使人君去此封比干之後修孕婦之墓應劭曰紂

心則國家安全也刺姓者觀其胎產也○索隱曰安紂封比干之後後謂子也不見其文尚書作封比干之墓又唯云刺剔孕婦則武王雖反

商政亦未必修孕婦之墓也故功業復就於天下何則欲善無

厭也夫晉文公親其讎彊霸諸侯齊桓公用其

仇而一匡天下謂晉寺人勃鞮齊管仲也何則慈仁懇勤誠加

於心不可以虛辭借也至夫秦用商鞅之法東

魯仲連鄒陽傳

弱韓魏兵彊天下而卒車裂之越用大夫種之

謀禽勁吳霸中國而卒誅其身是以孫叔敖三

去相而不悔索隱曰三得相不喜知其才之自得也三去相不悔知非己之罪也於陵子

仲辭三公為人灌園列士傳曰楚於陵子仲楚王欲以為相而不許為人灌園○索

隱曰孟子云陳仲子齊陳氏之族兄為齊卿仲子以為不義乃適楚居于於陵自謂於陵子仲楚王聘以為相子仲遂夫

妻相與逃為人灌園列士傳字子終者是也今人王誠能去驕傲之心懷

可報之意披心腹見情素墮肝膽施德厚終與

之窮達無愛於士則桀之狗可使吠堯韋昭曰言恩厚無不

使而蹠之客可使刺由應劭曰跖之客為其人使刺由由許由也跖盜跖也○索

隱曰並見戰國策況因萬乘之權假聖王之資乎然則荆



輒之湛七族要離之燒妻子

應劭曰荆軻為燕刺秦始皇不成而死其族坐

之湛沒吳王闔閭欲殺王子慶忌要離詐以罪亡令吳王燔其妻子要離走見慶忌以劍刺之張晏曰七族上至曾祖下

至曾孫○索隱曰湛音沉七族父之姓一也姑之子二也姊

凡七族也要離 豈足道哉臣聞明月之珠夜光之

璧以闇投人於道路人無不按劍相眄者何則

無因而至前也蟠木根柢輪困離詭張晏曰根柢

離詭委曲槃矣也○索隱曰孟康云 而為萬棄器者何

則以左右先為之容也索隱曰左右先加彫 故無

因至前雖出隨侯之珠夜光之璧猶結怨而不

見德故有人先談則以枯木朽株樹功而不忘

今夫天下布衣窮居之士身在貧賤雖包堯舜

之術

索隱曰言蒙被堯舜之道也

挾伊管之辯懷龍逢比干之

意欲盡忠當世之君而素無根柢之容雖竭精

思欲開忠信輔人主之治則人主必有按劍相

眄之跡是使布衣不得為枯木朽株之資也是

以聖王制世御俗獨化於陶鈞之上

漢書音義曰陶家名模下

圓轉者為鈞以其能制器為大小比之於天○索隱曰張晏云陶台鈞範也作器下所轉者名鈞韋昭曰陶燒瓦之籠鈞

木長七尺有絃所以調為器具也崔浩云以鈞制器萬殊故如造化之運轉裁成也

而不牽於卑

亂之語不奪於衆多之口故秦皇帝任中庶子

蒙嘉之言以信荆軻之說而匕首竊發

索隱曰通俗文

云其頭類匕故曰**周文王獵涇渭載呂尚而歸以王**

**天下故秦信左右而殺周用烏集而王**漢書昱曰義曰太公望

**何則以其能越**塗觀卒遇共成王功若烏鳥之暴集也

**學拘之語馳域外之議獨觀於昭曠之道也今**索隱曰韋昭云呂尚適周如烏之集也

**人主沈於諂諛之辭牽於帷裳之制**漢書音義曰言為左右便

**使不羈之士與牛驥同皁**漢書音義曰食牛馬器以

碑侍帷裳曰妾所見牽制木作如槽也○索隱曰言駮足不可羈絆以比喻逸才之人

應劭云皁歷也韋昭云皁養馬之官下士也養馬之官其衣皁也又郭璞云皁養馬之器也○正義曰顏云不羈言才識

**皁此鮑焦所以忿於世而不留富貴之樂也**如

曰莊子云鮑焦飾行非世抱木而死○索隱曰晉灼云列士傳鮑焦忿世不用已採蔬於道子貢難曰非其世而採其蔬

魯仲連鄒陽傳

此焦之有哉弃其疏乃立枯洛水之上案此  
事見莊子及說苑韓詩外傳小有不同也  
臣聞盛飾入

朝者不以利汙義砥厲名號者不以欲傷行故

縣名勝母漢書云里名勝母也○正義曰鹽鐵論  
比皆云里名尸子及此傳云縣名未詳也而曾

子不入索隱曰淮南子及鹽鐵論云里名勝母曾子不入  
蓋以名不順也尸子以為孔子至勝母縣暮而不

宿其說不同邑號朝歌而墨子迴車晉灼曰朝歌者不時也  
○正義曰朝歌今衛州

縣也今欲使天下寥廓之士攝於威重之權主於

位勢之貴故回面汙行以事諂諛之人索隱曰杜  
預云回邪

也而求親近於左右則士伏死堀穴巖巖之中

耳詩云節彼南山維石巖巖安肯有盡忠信而趨闕下者哉書

奏梁孝王孝王使人出之卒為上客

太史公曰魯連其指意雖不合大義然余多其在布衣之位蕩然肆志不詘於諸侯談說於當世折卿相之權鄒陽辭雖不遜然其比物連類有足悲者亦可謂抗直不撓矣吾是以附之列傳焉

索隱述贊曰

魯連達士

高才遠致

釋難解紛

辭祿肆志

齊將挫辯

燕軍沮氣

鄒子遇讒

見詆獄吏

慷慨獻說

時王所器

魯仲連鄒陽列傳第二十三

史記八十三

屈原賈生列傳第二十四 史記八十四

屈原者名平楚之同姓也 正義曰屈景昭皆楚之族王逸云楚王始都是生子

瑕受屈為卿因以為氏 為楚懷王左徒 正義曰蓋今在左右拾遺之類 博聞彊

志明於治亂嫺 史記音隱曰音閑 於辭令入則與王圖

議國事以出號令出則接遇賓客應對諸侯王

其任之上官大夫與之同列爭寵而心害其能

懷王使屈原造為憲令屈平屬草藁一 曰屬音日屬草藁

謂創制憲令之本漢書作草具崔浩謂發始造端也 未定上官大夫見而欲奪

之 正義曰王逸云上官靳尚 屈平不與因讒之曰王使屈平為

令眾莫不知每一令出平伐其功曰以為非我

莫能為也王怒而疏屈平屈平疾王聽之不聰也謾諂之蔽明也邪曲之害公也方正之不容也故憂愁幽思而作離騷索隱曰音素刀反一音蕭應劭曰離遭也騷憂也又

離騷序云離別也騷愁也 離騷者猶離憂也夫天者人之始也父母者人之本也人窮則反本故勞苦倦極未嘗不呼天也疾痛慘怛正義曰上七感反下丁達反慘毒也怛痛也 未嘗不呼父母也屈平正道直行正義曰 竭忠盡智以事其君讒人間之可謂窮矣信而見疑忠而被謗能無怨乎屈平之作離騷蓋自怨生也國風好色而不淫小雅怨誅而不亂正義曰誅才畏反 若

離騷者可謂兼之矣上稱帝嚳下道齊桓中述  
 湯武以刺世事明道德之廣崇治亂之條貫靡  
 不畢見其文約其辭微其志潔其行廉其稱文  
 小而其指極大舉類邇而見義遠其志潔故其  
 稱物芳其行廉故死而不容自踈濯淖汙泥之  
 中索隱曰濯音濁淖音鬧汙音烏故反泥音奴計反蟬蛻於濁穢正義曰蛻音稅去皮也又  
他卧反以浮游塵埃之外不獲世之滋垢皜然泥  
 而不滓者也徐廣曰皜踈靜之貌○索隱曰皜音自若反泥音涅滓音治又並如字推  
 此志也雖與日月爭光可也正義曰言屈平之仕濁世去其污垢在塵埃之  
外推此志意雖與日月爭其光明斯亦可矣屈平既絀其後秦欲伐齊齊



與楚從親

正義曰上足松反

惠王患之乃令張儀詳去秦

厚幣委質事楚曰秦甚憎齊齊與楚從親楚誠

能絕齊秦願獻商於之地六百里楚懷王貪而

信張儀遂絕齊使使如秦受地張儀詐之曰儀

與王約六里不聞六百里楚使怒去歸告懷王

懷王怒大興師伐秦秦發兵擊之大破楚師於

丹陽斬首八萬

索隱曰丹浙二水名也謂於丹水之北

浙是也。正義曰丹陽今歧江故城

虜楚將屈匄

索隱曰屈姓

遂取楚

之漢中地

徐廣曰楚懷王十六年張儀來相

懷王乃悉

發國中兵以深入擊秦戰於藍田魏聞之襲楚

屈原賈生傳

至鄧

索隱曰鄧在漢水北故鄧矣城也

楚兵懼自秦歸而齊竟怒

不救楚楚大困明年秦割漢中地與楚以和楚

王曰不願得地願得張儀而甘心焉張儀聞乃

曰以一儀而當漢中地臣請往如楚如楚又因

厚幣用事者臣靳尚而設詭辯於懷王之寵姬

鄭袖懷王竟聽鄭袖復釋去張儀是時屈原既

疏不復在位使於齊頃反諫懷王曰何不殺張

儀懷王悔追張儀不及

索隱曰張儀傳無此語

其後諸侯

共擊楚大破之殺其將唐昧

徐廣曰二十八年敗唐昧也○正義

曰昧莫葛反

時秦昭王與楚婚欲與懷王會懷王

欲行屈平曰秦虎狼之國不可信不如無行

索隱曰楚世家昭睢有此言蓋二人同諫王故彼此各隨錄之也懷王稚子子蘭

勸王行奈何絕秦歡懷王卒行入武關秦伏

兵絕其後因留懷王徐廣曰三十年入秦以求割地懷

王怒不聽亡走趙趙不內復之秦竟死於秦

而歸葬長子頃襄王立索隱曰以其弟子蘭

為令尹楚人既咎子蘭以勸懷王入秦而不反

也屈平既嫉之雖放流睠顧楚國繫心懷王不

忘欲反冀幸君之一悟俗之一改也其存君興國

而欲反覆之一篇之中三致志焉然終無可奈何

屈原賈生傳

故不可以反卒以此見懷王之終不悟也人君

無愚智賢不肖

索隱曰此已下太史公傷楚懷王之不能反國之論也

莫

不欲求忠以自為舉賢以自佐然亡國破家相

隨屬而聖君治國累世而不見者其所謂忠者

不忠而所謂賢者不賢也懷王以不知忠臣之

分故內惑於鄭袖外欺於張儀疏屈原而信上

官大夫令尹子蘭兵挫地削亡其六郡身客死

於秦為天下笑此不知人之禍也易曰井泄不

食

向秀曰泄者浚治去泥濁也○索隱曰向秀字子期晉人注周易

為我心惻

張璠曰可

為惻然傷道未行也○索隱曰張璠亦晉人注易也

可以汲王明並受其福

易象

曰求王明受福也○索隱曰京房易章句言我之道可汲而用上  
有明主汲我道而用之天下並受其福故曰王明並受其福  
也  
王之不明豈足福哉  
徐廣曰一云不足福○正義曰言楚王不明忠臣豈

是受福故屈原懷沙自沉令尹子蘭聞之大怒卒使上官大夫

短屈原於頃襄王頃襄王怒而遷之  
離騷序曰遷於江南屈

原至於江濱被髮行吟澤畔顏色憔悴形容枯

槁漁父見而問之  
索隱曰父音甫曰子非三閭大夫歟

離騷序曰三閭之職掌王族三姓曰昭何故而至此屈

原曰舉世混濁而我獨清眾人皆醉而我獨醒

是以見放漁父曰夫聖人者不疑滯於物而能

與世推移舉世混濁何不隨其流而揚其波  
索隱

屈原賈生傳

曰楚詞隨其流  
作滑其泥也

眾人皆醉何不舖其糟而啜其醅

何故懷瑾握瑜而自令見放為

索隱曰楚詞懷瑾  
握瑜作深思高舉

也屈原曰吾聞之新沐者必彈冠新浴者必振

衣人又誰能以身之察察王逸曰已靜潔受物之汶汶

者乎

王逸曰蒙垢敝○索隱曰汶汶  
音門門汶汶猶昏暗不明也

寧赴常流而葬

乎江魚腹中耳

索隱曰常流  
猶長流也

又安能以皓皓之白

而蒙世之溫蠖乎

索隱曰蠖音烏鄭反溫蠖猶  
惜憤楚詞作蒙世之塵埃哉

乃作

懷沙之賦

索隱曰楚詞九懷曰懷  
沙礫以沉此其義也

其辭曰陶陶孟夏

兮草木莽莽

王逸曰陶陶盛陽貌莽莽盛茂貌  
索隱曰莽音姥○正義曰莫古反

傷懷

永哀兮汨徂南土

王逸曰汨行貌○索隱  
曰方言曰汨謂疾行也

眴兮窈窕

徐廣曰胸眩也。○索隱曰胸音瞬，窈音烏鳥反。孔靜幽墨，王逸曰孔甚也，墨無聲也。○正義曰孔甚

之胸野甚清淨，歎無人聲。墨無聲言江南山高澤深，視之胸野甚清淨，歎無人聲。冤結紆軫兮離愍之長

鞠，王逸曰鞠窮紆屈也。軫痛也，愍病也。撫情効志兮俛詘以自抑，元

方以為園兮常度未替，王逸曰元削度法替廢也，言人元削方木欲以為圓其常

法度尚未廢也。○索隱曰元音五官反。易初本由兮君子所鄙，王逸曰由

義曰本常也，鄙耻也。言人遭世不道變易初行違離常道，君子所鄙。章畫職墨兮前度未

改，王逸曰章明也，度法也。言上明於所畫，念其繩墨修前人

楚詞職作志志念也。余如注所解。內直質重兮大人所盛，王逸曰言

厚心志正直行無過失。則大人君子所盛美也。巧匠不斷兮孰察其揆，正玄

文幽處兮矇謂之不章，王逸曰玄黑也，矇盲者也。離

屈原賈生

婁微睇兮瞽以為無明王逸曰離婁古明視者也瞽盲也。正義曰睇田帝反眇

也變白而為黑兮倒上以為下索隱曰鳳皇在下音戶鳳皇在

箴兮雞雉翔舞徐廣曰箴一作郊駟案王逸曰箴籠落也。索隱曰箴音奴又音女加反籠落

謂藤蘿之相籠絡也楚詞雉作鷩。正義曰應瑞圖云黃帝問天老曰鳳鳥何如天老曰鴻前而鱗後蛇頸而魚尾龍文而龜身燕頤而鷄豕首戴德頸揭義背負仁心入信翼同

侯順足履正尾繫武小音金大音鼓延頸奮翼五光備舉同

玉石兮一槩而相量王逸曰忠佞不異夫黨人之鄙妬兮

羌不知吾所臧王逸曰莫昭我之善意。索隱曰按王師叔云羌楚人語辭言卿何為也。正

義曰羌音疆任重載盛兮陷滯而不濟王逸曰言已才力盛壯可任用重載

而身陷沒沉滯不得成其本志也懷瑾握瑜兮窮不得余所示王逸曰

曰示語也邑犬羣吠兮吠所怪也誹駿疑桀兮固庸



態也。王逸曰：千人才為俊，一國高為桀也。庸斯賤之人也。

索隱曰：尹文子云：千人才曰俊，萬人曰桀。今乃誅

駭疑桀固是庸人之態也。文質踈內兮衆不知吾之異采。徐廣曰：異

一作奧駟案王材樸委積兮莫知余之所有重仁

逸曰：采文采也。重華不可悟兮

孰知余之從容。王逸曰：悟逢也。○索隱曰：楚詞：悟作遇，並吾故反。古固有不可

並兮，豈知其故也。索隱曰：楚詞作莫知其何故。湯禹久遠兮邈

不可慕也。懲違改忿兮，抑心而自彊。離潛而不

遷兮，願志之有象。王逸曰：象法也。進路北次兮，正義曰：北次將就。日

昧昧其將暮。含憂虞哀兮，限之以大故。王逸曰：娛謂死亡也。○索隱曰：楚詞：含憂虞，哀作舒憂，娛哀，娛音虞，娛者樂也。亂曰：索隱曰：王師叔云：亂者理也，所以發

屈原賈生傳

理辭指摠撮其要而重理前意也  
**浩浩沅湘兮**索隱曰二水各地理志湘水出零陵海陽山北入江

沅即湘之後流也○正義曰說文云沅水出牂牁東北流入江湘水出零陵縣海山北至入江按二水皆經岳州而入大

江也**分流汨兮**王逸曰汨流也**脩路幽拂兮**索隱曰楚詞作幽蔽也**道遠**

**忽兮曾嗟恒悲兮****永歎慨兮****世既莫吾知兮****人**

**心不可謂兮**王逸曰謂猶說也○索隱曰楚詞無曾嗟已下二十一字**懷情抱質兮**

**獨無匹兮****伯樂既歿兮****驥將焉程兮**王逸曰程量也**人生**

**有命兮****各有所錯兮**王逸曰錯安也**定心廣志****余何畏懼**

**兮**索隱曰楚詞餘並作余**曾傷爰哀永歎****喟兮**王逸曰喟息也**世溷**

**不吾知****心不可謂兮****知死不可讓兮****願勿愛兮**

**明以告君子兮****吾將以為類兮**王逸曰類法也○正義曰按類例也以爲

忠臣不事亂君之例於其懷石遂自投汨羅以死應劭曰汨水在羅故曰汨

羅也○索隱曰地理志長沙有羅縣羅子之所徙荆州記羅縣北帶汨水音覓○正義曰故羅縣城在岳州相陰縣東北

六十里春秋時羅子國秦置長沙郡而為縣也按縣北有汨水及屈原廟續齊諧記云屈原以五月五日投汨羅而死楚

人哀之每於此日以筒貯米投水祭之漢建武中長沙區回白曰忽見一人自稱三閭大夫謂回曰聞君常見祭其善但

常年所遺並蛟龍所竊今若有惠可以練樹葉塞上以五色絲轉縛之此物蛟龍所憚回依其言世人五月五日作糉并

帶五色絲及練葉皆汨羅之遺風 屈原既死之後楚有宋玉唐勒

景差徐廣曰或作慶○索隱曰揚子法言及漢書古今人表皆作景差今作差是字省耳以徐裝鄒三家皆無

音是如字讀也之徒者皆好辭而以賦見稱然皆祖屈原

之從容辭令終莫敢直諫其後楚日以削數十

年竟為秦所滅自屈原沈汨羅後百有餘年漢

有賈生爲長沙王太傅過湘水投書以弔屈原  
賈生名誼維陽人也年十八以能誦詩屬書聞  
於郡中吳廷尉爲河南守聞其秀才

正義曰顏云  
秀美也應劭

云避光武諱  
改茂才也

召置門下甚幸愛孝文皇帝初立聞

河南守吳公

索隱曰吳姓史  
失名故稱公

治平爲天下第一故

與李斯同邑而常學事焉乃徵爲廷尉廷尉乃  
言賈生年少頗通諸子百家之書文帝召以爲  
博士是時賈生年二十餘最爲少每詔令議下  
諸老先生不能言賈生盡爲之對人人各如其  
意所欲出諸生於是乃以爲能不及也孝文帝

說之超遷一歲中至太中大夫賈生以為漢興  
至孝文二十餘年天下和洽而固當改正朔易  
服色法制度定官名典禮樂乃悉草具其事儀  
法色尚黃數用五正義曰漢文帝時黃龍見成紀故改為土也為官名悉  
更秦之法孝文帝初即位謙讓未遑也諸律令  
所更定及列侯悉就國其說皆自賈生發之於  
是天子議以為賈生任公卿之位絳灌東陽侯  
馮敬之屬盡害之正義曰絳灌周勃灌嬰也東陽侯張相如馮敬時為御史大夫乃  
短賈生曰雒陽之人年少初學專欲擅權紛亂  
諸事於是天子後亦疏之不用其議乃以賈生

為長沙王太傅

索隱曰誼為傅是吳芮之玄孫差襲長沙王之時也非景帝之子長沙王發也

荆州記長沙城西隅有賈誼祠及誼坐石牀在也

賈生既辭往行聞長沙卑

溼自以壽不得長又以適去

徐廣曰竹革反章昭曰謫謹也○索隱曰字林

云適音丈厄反

意不自得及渡湘水為賦以弔屈原其

辭曰共承嘉惠兮

張晏曰恭敬也

俟罪長沙側聞屈原

兮自沈汨羅造託湘流兮敬弔先生

索隱曰造音七到反

遭

世罔極兮乃隕厥身嗚呼哀哉逢時不祥鸞鳳

伏竄兮鷓鴣梟翔

索隱曰竄音七外反

闕茸尊顯兮讒諛

得志

索隱曰闕音天曠反茸音而隴反應劭胡廣云闕茸不才之人無六翮翱翔之用而反尊貴字林云闕茸

不肖之人也

賢聖逆曳兮方正倒植

索隱曰胡廣云逆曳不得順而行也倒植

賢不肖顛倒而易位也

世謂伯夷貪兮謂盜跖廉

索隱曰漢書作隨夷溷兮

跖躡廉一句皆兼兩人隨下隨夷伯夷躡盜跖躡莊躡也

莫邪為頓兮

應劭曰莫邪吳大夫也作

實劍因以冠名璜曰許慎曰莫邪大戟也○索隱曰吳越春秋曰吳王使干將造劍二枚一曰干將二曰莫耶莫耶干將

劍名也頓續為鈍

鈇刀為鈇

徐廣曰思廉反駟案漢書音義曰鈇謂利○索隱曰鈇者錫也鈇利也音

織言其暗惑也

于嗟嚶嚶兮生之無故

應劭曰嚶嚶不自得意璜曰生謂屈原也

幹

棄周鼎兮而寶康瓠

如淳曰幹轉也爾雅曰康瓠謂之瓠大瓠也應劭曰東容也幹音莞

蹇驢

正義罷音皮

驥垂兩耳兮服鹽車

索隱曰戰國策曰夫驥服鹽車

上太山中坂遷延負轅不能上伯樂下車哭之者也

章甫薦履兮

應劭曰章甫殷冠也

漸

不可以

劉向別錄曰因以自諭自恨也

嗟苦先生兮獨離此咎

應劭

屈原賈生傳

曰嗟咨嗟勞苦李奇曰訊告也張晏曰訊離騷下竟訊曰亂辭也○索隱曰訊音信劉伯莊音

屈原遇此難也素對反訊猶宣也重宣已矣國其莫我知獨堙鬱兮其意周成解詰音碎也

索隱曰漢書作壹鬱亦通其誰語鳳漂漂其高濳兮索隱曰夫固索隱曰

自縮而遠去襲九淵之神龍兮鄧展曰襲重也或

也○索隱曰莊子曰千金之珠必在九重龍領下故云九淵之神龍也泐徐廣曰深潛泐筆反

巨自珍徐廣曰泐彌融爚徐廣曰一云倆蟻頰○正義

光也沒深藏以自珍潛藏也以隱處兮徐廣曰一本云彌蜎蜎以

彌遠明光以隱處也蘇林云倆音面應劭云倆背也蟻頰水

注蓋三本摠不同也郭璞注爾雅云似鳧江東謂之夫豈從蝥與蛭蟻漢書蝥字作蝥章昭曰蝥殺墓也

蟻漢書作蝥言倆然絕於蟻頰况從蝥與蛭蟻也蛭音質所蟻音引○正義曰言寧投水合神龍豈陸葬從蟻與蛭蚓



貴聖人之神德兮遠濁世而自藏使騏驥可得

係羈兮豈云異夫犬羊正義曰使騏驥可得係縛羈絆則與犬羊無異責屈原不去濁

世以藏隱其文如般紛紛其離此尤兮蘇林曰般音盤孟康曰般

音班或曰盤桓不去紛紛構譏亦夫子之辜也索隱曰漢

書幸作故夫子謂屈原也李奇曰亦騶九州而相君兮

索隱曰騶音丑知反謂何必懷此都也鳳皇翔于千

仞之上兮覽德輝焉下之索隱曰言鳳皇翔見人君

乎內見細德之險微兮搖增翻徐廣曰一云逝而

去之正義曰搖動也增加也言見細德之人又彼尋常

之汙瀆兮應劭曰八尺曰尋倍尋曰常豈能容吞舟

屈原賈生傳

之魚橫江湖之鱣鱠

如淳曰大魚也瓚曰鱣魚無鱗口近腹下

固將

制於螻蟻

索隱曰莊子云夷桑楚謂弟子曰吞舟之魚蕩而失水則螻蟻能苦之戰國策齊人說靖郭君

亦同案以喻小國暗主不容忠臣而為讒賊小臣之所見害也

賈生為長沙王太傅

正義曰漢文帝年表云吳芮之玄孫差襲長沙王也傳為長沙靖王差之二年也括地志云吳芮故城在潭州長沙縣東南三百里賈誼宅在縣南三十步湘水記云誼宅中有一井誼所穿極小而深上斂下大其狀如壺傍有一高脚石床容

一人坐形流古制相承云誼所坐

楚人命鴉曰服

三年有鴉飛入賈生舍止於坐隅

晉灼曰異物志有山鴉體有文色土俗因形名之曰服不能遠飛行不出域索

隱曰鄧展云似鴉而大荆州記云巫縣有鳥如雌雞其雄為鴉楚人謂之服吳錄云服黑色也鳴自呼其名

賈生

既以適居長沙長沙卑溼自以為壽不得長傷

悼之乃為賦以自廣

索隱曰姚氏云廣猶寬也

其辭曰單闕

之歲方

徐廣曰歲在卯曰單闕文帝六年歲在丁卯○索隱曰李巡云單闕起也陽氣推萬物而起故曰單

闕孫炎本作蟬焉蟬猶伸也○正義闕烏昌反

四月孟夏庚子日施方服集

予舍

徐廣曰施一作斜○索隱曰施音矢後反猶西斜也漢書作斜

止于坐隅貌甚

間暇異物來集方私怪其故發書占之方策言

其度

索隱曰漢書作識說文云識驗言也此作策蓋識策之辭○正義曰發策數之書占其度驗

曰

野鳥入處方主人將去請問于服方予去何之

索隱曰于於也漢書作予服小顏云予加美之辭

吉乎告我凶言其菑

正義音災

淹數之度方語予其期

徐廣曰數速也

服乃歎息舉首

奮翼口不能言請對以臆

正義曰協韻音憶

萬物變化

方固無休息幹流而遷方或推而還

索隱曰幹音烏活反幹轉

屈原賈生傳

也形氣轉續方化變而嬗

服虔曰嬗音如嬗反變蛻也或曰嬗蔓相連也○索

隱曰韋昭云而如也如蟬之蛻化也蘇林云嬗音蟬謂其相傳之也

沕穆無窮方胡可勝

言

索隱曰漢書無窮作無閒沕音蜜又音昧沕穆深微兒以言其理深微不可尽言也○正義沕音勿

禍方

福所倚

正義曰於儀反依也

福方禍所伏

索隱曰此老子之言然禍字古作既案倚者立

也伏下身也以言禍福遞來猶如伏立也

憂喜聚門方吉凶同域

正義曰言禍福

相因吉凶不定

彼吳疆大方夫差巨敗越棲會稽方句踐

霸王斯游遂成方卒被五刑

韋昭曰斯李斯也

傳說胥靡

方

徐廣曰胥刑也○索隱曰晉灼云胥相也蘇隨也古者相隨坐輕刑之名墨子云傳說衣褐帶素傭築於傳巖

在河東大陽縣又夏靖書云倚氏十里河西岸吳坂下便得隱穴是說所潛身處也

乃相武丁夫

禍之與福方何異糾纏

應劭曰福禍相為表裏如糾纏繩索相附會也贊曰糾絞

也纏索也○索隱曰韋昭云纏激也又通俗文云合繩曰糾字林云纏三合繩也音墨糾音九

命不可說

方孰知其極水激則旱方矢激則遠

索隱曰此淮南子及鷓冠

子文也彼作水激則旱而呂氏春秋作疾以言水激則去疾不能浸潤矢激疾則去遠也說文旱與悍同音以言水矢流

飛本以無礙為通利今遇有物觸之則激怒更勁疾而遠悍猶人或因禍致福倚伏無常也

萬物回薄

方振蕩相轉雲蒸雨降方錯繆相紛大專槃物

方漢書專字作鈞如溥曰陶者作器於鈞上此以造化為大鈞○索隱曰漢書云大鈞播物此專讀曰鈞槃猶轉也與

播義同虞喜志林云大鈞造化之神鈞陶萬物品授羣形者也案上鄒陽傳注云陶家各模下圓轉者為鈞言其能制器

大小以比塊軋無垠應劭曰其氣塊軋非有限齊也塊音之於天

無有齊畔也說文云垠圻也郭璞注方言云塊軋者不利也王逸注楚詞云塊軋霧氣昧也○正義曰塊鳥助反軋於黠反

天不可與慮方道不可與謀遲數有命

索隱曰與音預

方惡識其時且夫天地為爐方造化為工

索隱曰此

莊子文

陰陽為炭方萬物為銅

索隱曰既以陶冶喻造化故以陰陽為炭萬物

也為銅

合散消息方安有常則

索隱曰莊子云人之生也氣之聚也聚則為生

散則為死

千變萬化方未始有極

索隱曰莊子云人者萬化而未始有極

忽

然為人方何足控搏

如淳曰控引也控搏玩弄愛生之意也○索隱曰搏音徒端反又本

作控揣揣音初委反又音丁果反揣者量也故晉灼云或然為人言此生其輕耳何足引物量度已年命之長短而愛惜

也化為異物方又何足患

索隱曰謂死而形化為鬼是為異物也患協韻音環

小知自私方賤彼貴我

索隱曰莊子云以物觀之自貴而相賤也

通人

大觀方物無不可

索隱曰莊子物故有所然物固有所可無物不然無物不可

貪

夫徇財方列士殉名

應劭曰徇營也賁曰以身從物曰徇○索隱曰此語亦出莊子

夸

者死權方

應劭曰夸毗也。好榮死於權利。瓚曰夸泰也。莊子曰：「權勢不尤，則夸者不悲也。」索隱曰：「言好

夸毗者死於權利，是言貪勢以自矜夸者至死不休也。尤甚也。言勢不甚用，則夸毗者可悲也。

品庶馮生

孟康曰：馮貪也。索隱曰：漢書作每生，音謀。在反服虔云：每念生也。鄒誕本亦作每言，唯念生而已。今此作馮馮亦持念

之意也。然案方言每字合從手。旁音謀，改反。正義曰：馮音憑。

怵迫之徒方或趨西

東

孟康曰：怵為利所誘，怵也。迫迫貧賤東西趨利也。索隱曰：漢書亦有怵私東應劭云：仕諸侯為私時天子居

長安諸王悉在關東，小人怵然內迫私家樂仕諸侯，故云怵迫私東也。李奇曰：私多作西者，言東西趨利也。怵音黜，又怵

者誘也。

大人不曲方億變齊同

索隱曰：張機云：德無不包，靈府弘曠，故名大人。

拘士繫俗方攬如囚拘

徐廣曰：攬音華，板反。又音皖。索隱曰：說文云：攬，大木柵也。

漢書作篋，音去隕反。

至人遺物方獨與道俱

索隱曰：莊子云：古之至人先存諸已

後存諸人。張機云：躰盡於聖德美之極，謂之至人。

衆人或或方好惡積意

曰或或東西也所好所惡積之萬億也瓚曰言  
衆懷抱好惡積之心意○正義曰意合韻音憶  
真人淡漠

兮獨與道息索隱曰莊子云古之真人不知悅生不知惡死不以心捐死不以人助天呂氏春秋曰精氣曰

新斜氣盡去反其釋知遺形兮超然自喪服虔曰絕聖棄知而忘其

身也○索隱曰遺形者形故可使如槁木也自喪者心若死灰也莊周云今者吾喪我汝知之乎寥廓忽

荒兮與道翱翔乘流則逝兮得坻則止徐廣曰坻一作坎駟

案張晏曰坻水中小洲也○索隱曰漢書坻作坎周易坎九二有險言君子見險則止縱軀委命兮

不私與己其生若浮兮其死若休索隱曰莊子云勞我以生休我

以死澹乎若深淵之靜汎乎若不繫之舟索隱曰出

莊不以生故自寶兮養空而游漢書音義曰如舟之空也○索隱曰

鄧展云自寶自貴也養空而游言躰道之人但養空性而心若浮舟也德人無累兮知命



不憂

索隱曰德人謂上德之人心  
中無物累是得道之士也

細故懣荊兮何足

以疑

韋昭曰懣音士介反○索隱曰荊音介漢書作介張  
揖云懣介鯁刺也以言細微事不足懣介我心故於

此云何足以疑之者也○正義曰懣刃邁反荊如邁反

後歲餘賈生徵見孝文

帝方受齋

徐廣曰祭祀福脈也駟案如淳曰漢唯祭  
天地五時皇帝不自行祠還致福齋音傷

坐宣

室

蘇林曰未央前正室○索隱曰三輔故事  
云宣室在未央殿北應劭云齋祭余肉也

上因感鬼神

事而問鬼神之本賈生因具道所以然之狀至

夜半文帝前席既罷曰吾久不見賈生自以為

過之今不及也居頃之拜賈生為梁懷王太傅

索隱曰梁懷王  
名揖文帝子

梁懷王文帝之少子愛而好書故

令賈生傳之文帝復封淮南厲王子四人皆為

列侯賈生諫以為患之興自此起矣賈生數上  
疏言諸侯或連數郡非古之制可稍削之文帝  
不聽居數年懷王騎墮馬而死徐廣曰文帝十一年無後  
賈生自傷為傅無狀哭泣歲餘亦死賈生之死  
時年三十三矣及孝文崩孝武皇帝立舉賈生  
之孫二人至郡守而賈嘉最好學世世其家與  
余通書至孝昭時列為九卿

太史公曰余讀離騷天問招魂哀郢悲其志適

長沙觀屈原所自沈淵

索隱曰荊州記云長沙羅縣北帶汨水去縣四十里是原

自沈處北岸有廟也

未嘗不垂涕想見其為人及見賈生弔

之又怪屈原以彼其材游諸侯何國不容而自  
令若是讀服鳥賦同死生輕去就又爽徐廣曰一  
本作爽  
然自失矣

索隱述贊曰

屈平行正

以事懷王

瑾瑜比潔

日月爭光

忠而見放

讒者益章

賦騷見志

懷沙自傷

百年之後

空悲弔湘

屈原賈生列傳第二十四

史記八十四

呂不韋列傳第二十五

史記八十五

呂不韋者陽翟大賈人也

索隱曰翟音狄俗又音宅地理志縣名屬潁川戰國

策以不韋為濮陽人又記其事迹亦多與此傳不同班固雖云太史公採戰國策然為此傳當別有所聞見故不全依彼

說文者劉向定戰國策時以已異聞改易彼書遂令不與史記合之也賈音古鄭玄注周禮云行曰商處曰賈○正義曰

陽翟今河南府也往來販賤賣買徐廣曰一本云陽翟大賈也往來賤買賣賣也○索隱曰

王劭賣作鬻音育育家育賣義同今如字讀家累千金秦昭王四十年太

子死其四十二年以其次子安國君為太子索隱曰名柱後立是為孝文王也

安國君有子二十餘人安國君有

所甚愛姬立以為正夫人號曰華陽夫人華陽

夫人無子安國君中男名子楚索隱曰即莊襄王也戰國策曰本名

異人後從趙還不韋使以楚服見王后悅之  
曰吾楚人也而子字之乃變其名曰子楚  
子楚母曰夏

姬母愛子楚為秦質子於趙  
索隱曰質舊音致今讀依此穀梁傳曰交質子

不及二伯左傳曰信  
秦數攻趙趙不甚禮子楚子  
不由中質無益也

楚秦諸庶孽孫  
索隱曰韓信傳亦曰韓信襄王之孽孫張晏曰孺子曰孽子何休注公羊孽子

賤子也非嫡  
質於諸侯車乘進用不饒  
索隱曰下文又云以五百

正之子曰孽  
居劇困不得意呂不  
金為進用宜依小顏讀為蕘音才刃反進者財也古字假借之也

韋賈邯鄲見而憐之曰此奇貨可居  
以子楚方財貨也○正義

曰戰國策云濮陽人呂不韋賈邯鄲見秦質子異人謂其父  
曰耕田之利幾倍曰十倍珠玉之贏幾倍曰百倍立主定國

之贏幾倍曰無數不韋曰今力田疾作不得煖衣飽食今定  
國立君澤可遺後世願往事之秦子異人質於趙處於聊城

故往說之乃說秦王后弟揚泉君曰君之罪至死君知之乎  
君門下無不居高官尊位太子門下無貴者而駿馬盈外廄

呂不韋傳

美女克後庭王之春秋高矣一日山陵太子用事君危於累卵而不壽於朝生今有計可以使君富千萬寧於太山必無危亡之患矣揚泉曰請聞其說不韋曰王年高矣王后無子子後有承國之業士倉又輔之王一日山陵子後立士倉用事王后之門必生蓬蒿子楚異人賢材也棄在於趙無母引領西望欲一得歸王后誠請而立之是異人無國有國王后無子有子揚泉曰諾入說王后為請於趙而歸之乃往見子楚說曰吾能大

子之門子楚笑曰且自大君之門而乃大吾門

呂不韋曰子不知也吾門待子門而大子楚心

知所謂乃引與坐深語索隱曰既解不韋所言之意遂與密謀深語也呂不

韋曰秦王老矣安國君得為太子竊聞安國君

愛幸華陽夫人華陽夫人無子能立適嗣者正義

曰適音嫡獨華陽夫人耳今子兄第二十餘人子又

居不甚見幸久質諸侯即大王薨安國君立

為王則子無幾得與長子正義曰言子楚無望得預長為太子及諸

子旦暮在前者爭為太子矣索隱曰幾音冀幾望也左傳曰日月以幾戰國

策曰子後承國之業又有母在中高誘子楚曰然為之注云子後秦太子異人之異母兄弟也

奈何呂不韋曰子貧客於此非有以奉獻於親

及結賓客也不韋雖貧請以千金為子西游事

安國君及華陽夫人立子為適嗣子楚乃頓首

曰必如君策請得分秦國與君共之呂不韋乃

以五百金與子楚為進用結賓客而復以五百

金買奇物玩好自奉而西游秦求見華陽夫人

姊而皆以其物獻華陽夫人因言子楚賢智結  
諸侯賓客徧天下常曰楚也以夫人為天日夜  
泣思太子及夫人夫人大喜不韋因使其姊說  
夫人索隱曰戰國策作說秦王后弟陽泉君也曰吾聞之以色事人者  
色衰而愛弛今夫人事太子甚愛而無子不以  
此時蚤自結於諸子中賢孝者舉立以為適而  
子之索隱曰以此為一句子謂養之為子也然欲分立以為適作上句而子之夫在則尊重作下句意亦通  
夫在則重尊夫百歲之後所子者為王終不失  
勢此所謂一言之利也不以繁華時樹  
本即色衰愛弛後雖欲開一語尚可得乎今子



楚賢而自知中男也次不得為適其母又不得  
幸自附夫人夫人誠以此時拔以為適夫人則  
竟世有寵於秦矣華陽夫人以為然承太子閒  
從容言索隱曰閒音閑  
從音七恭反子楚質於趙者絕賢來往  
者皆稱譽之乃因涕泣曰妾幸得充後宮不幸  
無子願得子楚立以為適嗣以託妾身安國君  
許之乃與夫人刻玉符約以為適嗣安國君及  
夫人因厚餽遺子楚而請呂不韋傅之子楚以  
此名譽益盛於諸侯呂不韋取邯鄲諸姬絕好  
善舞者與居索隱曰言其女容  
絕美而又善舞也知有身子楚從不

史記卷一百一十五

韋飲見而說之因起為壽請之呂不韋怒念業

已破家為子楚欲以釣奇索隱曰釣者以取魚喻也奇即上云此奇貨可居也

乃遂獻其姬姬自匿有身至大期時徐廣曰期十月也○索

隱曰譙周云人十月生此過二月故云大期蓋當然也既云自匿有娠則生政固當踰常期也生子政子

楚遂立姬為夫人秦昭王五十年使王齕圍邯

鄲急趙欲殺子楚子楚與呂不韋謀行金六百

斤予守者吏得脫亡赴秦軍遂以得歸趙欲殺

子楚妻子子楚夫人趙豪家女也得匿以故母

子竟得活秦昭王五十六年薨太子安國君立

為王華陽夫人為王后子楚為太子趙亦奉子

史記卷一百一十五

楚夫人及子政歸秦秦王立一年薨謚為孝文

王太子子楚代立是為莊襄王莊襄王所養母

華陽后為華陽太后索隱曰劉氏本作所生母生衍字今檢諸本並無生字也真

毋夏姬尊以為夏太后莊襄王元年以呂不韋

為丞相封為文信侯索隱曰下文尊為相國案百官表云皆秦官金印紫綬掌承天子助

理萬機秦署左右高帝署一後又食河南洛陽十萬戶

更名相國哀帝時更名大司徒索隱曰戰國策曰食藍田十二縣而秦本紀莊襄王元年初

置三川郡地理志高祖更名河南此秦代而曰河南者史記

後作據漢郡莊襄王即位二年薨太子政立為王

而言之耳徐廣曰時年十三尊呂不韋為相國號稱仲父正義曰仲中

呂不韋傳

效齊桓公以管仲為仲父秦王年少太后時時竊私通呂不韋

不韋家僮萬人當是時魏有信陵君

正義曰年表云秦昭王五

十六年平原君卒始皇四年信陵君死始皇九年李園殺春申君孟嘗君當秦昭王二十四年已後而卒最早

楚有

春申君趙有平原君齊有孟嘗君

索隱曰王劭云孟嘗春申死已

父據表及傳孟嘗春申死稍在前信陵將五國兵攻秦河外正當在莊襄王時不韋已為相又春申與不韋並時各相向十餘年不得言死之久矣

皆下士喜賓客以相傾呂不韋以秦

之彊羞不如亦招致士厚遇之至食客三千人

是時諸侯多辯士如荀卿之徒著書布天下呂

不韋乃使其客人人著所聞集論以為八覽六

論十二紀二十餘萬言

索隱曰八覽者有始孝行慎大先識審分審應離俗時君

也六論者開春慎行貴直不苟以順士容也十二紀者記十二月也其書有孟春等紀二十餘萬言二十餘卷也

以

為備天地萬物古今之事號曰呂氏春秋布咸

陽市門

索隱曰地理志右扶風渭城縣故咸陽高帝更名新咸陽武帝更名渭城案咸訓皆其地在渭水之北

北阪之南水北曰陽山南亦曰陽皆在二者之陽也

懸千金其上延諸侯游士

賓客有能增損一字者予千金始皇帝益壯太

后淫不止呂不韋恐覺禍及已乃私求大陰人

嫪毐以為舍人時縱倡樂使毒以其陰關桐輪

而行

正義曰以桐木為小車輪

令太后聞之以啗太后太后聞

果欲私得之呂不韋乃進嫪毐詐令人以腐罪

告之

正義曰上音輔謂宮刑骨靡也

不韋又陰謂太后曰可事詐

腐則得給事中大后乃陰厚賜主腐者更詐論

呂不韋傳

之拔其鬚眉為宦者遂得侍太后太后私與通

絕愛之有身太后恐人知之詐上當避時徙宮

居雍

正義曰雍故城在岐雍縣南七里有秦都大鄭宮

嫪毐常從賞賜甚厚

事皆決於嫪毐毐毐家僮數千人諸客求宦為

嫪毐舍人千餘人始皇七年莊襄王母夏太后

薨孝文王后曰華陽太后與孝文王會葬壽陵

正義曰秦孝文王陵在雍州萬年縣東北二十五里

夏太后子莊襄王葬芷陽

索隱曰芷音止地理志云京北霸陵縣故芷陽案在長安東也○正義曰秦襄莊陵在雍州新豐縣西南三十五里始皇

在北故俗亦謂之見子陵

故夏太后獨別葬杜東

索隱曰杜原之東也○正義曰

夏太后陵在萬年縣東南二十五里

曰東望吾子西望吾夫後百年

旁當有萬家邑

索隱曰宣帝元康元年起杜陵漢舊儀武昭宣三陵皆三萬戶計去此一百六

十餘年也

始皇九年有告嫪毐實非宦者常與太后

私亂生子二人皆匿之與太后謀曰王即薨以

子為後

說苑曰毒與侍中左右貴臣博飲酒醉爭言而闕瞋目大叱曰吾乃皇帝假父也嫫人子何敢乃與

我亢所與闕者走行白始皇○索隱曰劉氏嫫音其矩反今俗本多作屢字蓋相承錯耳不近詞義說苑作嫫子言輕諸

侍中以為窮於是秦王下吏治具得情實事連相

國呂不韋九月夷嫪毐二族殺太后所生兩子

而遂遷太后於雍

索隱曰說苑云遷太后咸陽宮地理志雍縣有咸陽宮秦昭王所起也

諸嫪毐舍人皆沒其家而遷之蜀

索隱曰家謂家生貨物並沒於

官人口則

王欲誅相國為其奉先王功大及賓客

呂不韋傳

辯士為游說者衆王不忍致法秦王十年十月

免相國呂不韋及齊人茅焦說秦王秦王乃迎

太后於雍歸復咸陽徐廣曰入南宮而出文信侯就國

河南歲餘諸侯賓客使者相望於道請文信侯

秦王恐其為變乃賜文信侯書曰君何功於秦

秦封君河南食十萬戶君何親於秦號稱仲父

其與家屬徙處蜀呂不韋自度稍侵恐誅乃飲

酖而死徐廣曰十二年駟案皇覽曰不韋家在河南洛陽北邙道西大冢是也民傳言呂毋冢不韋妻先葬

故其冢名呂毋也秦王所加怒呂不韋嫪毐皆已死乃皆

復歸嫪毐舍人遷蜀者始皇十九年太后薨謚



為帝太后

索隱曰王劭云秦不用謚法比蓋號耳其義亦當然也始皇稱皇帝之後故其母號為帝太后

豈謂誅列生時之行乎

與莊襄王會葬芷陽

徐廣曰一作芷陽

太史公曰不韋及嫪毐毒貴封號文信侯

索隱曰文信侯不韋

封也嫪毐封長信侯上文已言不韋封此贊中言嫪毐得寵貴由不韋耳合作長信侯

人之告嫪毐

毒聞之秦王驗左右未發上之雍郊毒恐禍起

乃與黨謀矯太后璽發卒以反斬年宮

正義曰斬年宮在岐

州城內發吏攻毒毒敗亡走追斬之好時遂滅

其宗

索隱曰地理志扶風有好時縣

而呂不韋由此絀矣孔子之

所謂聞者其呂子乎

論語曰夫聞也者色取仁而行違居之不疑在邦必聞在家必聞馬

融曰此言佞人也

呂不韋傳

索隱述贊曰

不韋釣竒

委質子楚

華陽立嗣

邯鄲獻女

及封河南

乃號仲父

徙蜀懲謗

懸金作語

籌策既成

富貴斯取

呂不韋列傳第二十五

史記八十五

呂不韋傳

刺客列傳第二十六

史記八十六

曹沫者魯人也

索隱曰沫音亡葛反左氏穀梁並作曹  
劇然則沫宜音劇沫劇聲相近而字異

以勇力事魯莊公莊公好力曹沫為魯將與

齊戰三敗北魯莊公懼乃獻遂邑之地以和索隱

曰左傳齊人滅遂杜預云遂國在齊北蛇丘縣東北猶復也○正義曰故城在兗州龍丘縣西北七十六里也

以為將齊桓公許與魯會于柯而盟索隱曰杜預云齊北東阿

齊之柯邑猶祝柯今為祝阿也桓公與莊公既盟於壇上曹沫執

匕首劫齊桓公索隱曰匕音比劉氏云短劍也鹽鐵論以為長尺八寸其頭類匕故云匕首也

此事約公羊為說然彼無其名直云曹子而已且左傳魯莊十年戰長勺用曹劇謀敗齊而無劫桓公之事十三年盟于

柯公羊始論曹子穀梁此年推云曹劇之盟信齊侯也又不記其行事之時也桓公左右莫敢

動而問曰子將何欲

索隱曰公羊傳曰管子進曰君何求何休注云桓公六十不能應管仲

進為言

曹沫曰齊疆魯弱而大國侵魯亦以甚

矣今魯城壞即厭齊境

索隱曰齊魯隣接今齊數侵魯魯之城壞即厭近齊之境

也君其圖之桓公乃許盡歸魯之侵地既已言

曹沫投其匕首下壇北面就羣臣之位顏色不

變辭令如故桓公怒欲倍其約

索隱曰倍音佩

管仲曰不

可夫貪小利以自快棄信於諸侯失天下之援

不如與之於是桓公乃遂割魯侵地曹沫三戰

所亡地盡復予魯其後百六十有七年而吳有

專諸之事

專諸者吳堂邑人也

索隱曰專字亦作劇音同左傳作鱒設諸地理志臨淮有堂邑縣也

伍子胥之亡楚而如吳也知專諸之能伍子胥

既見吳王僚說以伐楚之利吳公子光曰彼伍

負父兄皆死於楚而負言伐楚欲自為報私讎

也非能為吳吳王乃止伍子胥知公子光之欲

殺吳王僚乃曰彼光將有內志未可說以外事

索隱曰言其將有內難弑君之志且對外事生文吳世家作知光有他志也

乃進專諸於公

子光光之父曰吳王諸樊諸樊弟三人次曰餘

祭

索隱曰祭音側界反

次曰夷昧

索隱曰昧音二葛反公羊作餘末

次曰季子

札諸樊知季子札賢而不立太子以次傳三弟

欲卒致國于季子札諸樊既死傳餘祭餘祭死  
傳夷昧夷昧死當傳季子札季子札逃不肯立  
吳人乃立夷昧之子僚為王公子光曰使以兄  
弟次邪季子當立必以子乎則光真適嗣當立  
故嘗陰養謀臣以求立光既得專諸善客待之  
九年而楚平王死索隱曰春秋昭二十六年楚子居卒是也吳世家云十二年此云九年並在僚之十一年也春吳王僚欲因楚喪使其二弟  
公子蓋餘屬庸將兵圍楚之潛索隱曰屬音燭二子僚之弟也左傳  
作掩餘屬庸掩蓋義同屬燭字相亂耳事在魯昭二十七年  
地理志盧江有潛縣天柱山在南杜預左傳注云潛楚邑在  
廬江六縣西南○正義曰潛故城在壽州霍山縣東二百步

使延陵季子於晉以

觀諸侯之變楚發兵絕吳將蓋餘屬庸路吳兵  
不得還於是公子光謂專諸曰此時不可失不  
求何獲且光真王嗣當立季子雖來不吾廢也  
專諸曰王僚可殺也母老子弱而兩弟將兵伐  
楚楚絕其後方今吳外困於楚而內空無骨鯁  
之臣是無如我何

索隱曰左傳直云王可殺也母老子弱是無若我何則是專設諸度僚可

殺言其少援助故云無奈我何太史公採其意且據上文因復加以兩弟將兵外困之辭而服虔杜預見左氏下文云我爾身也以其子為卿遂強解是無如我何猶言我無若是謂專諸欲以老弱託光義非允愜王肅之說亦依史記也

子光頓首曰光之身子之身也四月丙子光伏

甲士於窟室中

徐廣曰窟一作空○索隱曰僚之十二年夏也吳系家以為十三年非也左氏



經傳唯言夏四月公羊穀梁無其文此與吳系家皆稱丙子  
當有所據不知出何書左傳云伏甲士於窰室杜預謂掘地  
為室也所以下文云  
出其伏甲以攻王  
而具酒請王僚王僚使兵陳自

宮至光之家門戶階陛左右皆王僚之親戚也

夾立侍皆持長鉞音披○索隱曰兵器也劉逵吳都賦注鉞兩刃小刀酒既酣

公子光詳為足疾入窰室中索隱曰詳音陽為如字左傳曰光偽足疾此之

使專諸置匕首魚炙之腹中

而進之既至王前專諸擘魚因

以匕首刺王僚索隱曰刺音七賜反王僚立死左右亦殺

專諸王人擾亂公子光出其伏甲以攻王僚之

徒盡滅之遂自立為王是為闔閭闔閭乃封專

刺客傳

詳即偽也或讀為音偽非也豈詳偽重言耶

徐廣曰炙一作炮○正義炙者夜反

索隱曰刺音七賜反

索隱曰詳音陽為如字左傳曰光偽足疾此之

諸之子以為上卿其後七十餘年而晉有豫讓

之事

徐廣曰鬪閭元年至三晉滅  
智伯六十二年豫讓一作襄

豫讓者晉人也

索隱曰案此傳所  
說皆約戰國策文

故嘗事范中行

氏而無所知名

索隱曰案左傳范氏謂昭子吉射也自  
士會食邑於范因為范氏中行氏中行

文子荀寅也自荀林父  
將中行後因以官為氏

去而事智伯

索隱曰案智伯襄  
子荀瑤也襄子林

父弟荀首之後范中行  
智伯事已具趙系家

智伯甚尊寵之及智伯伐趙

襄子趙襄子與韓魏合謀滅智伯滅智伯之後

而三分其地趙襄子最怨智伯

索隱曰謂初以酒  
灌後又率韓魏水

灌晉陽城不沒者  
三板故怨深也

漆其頭以為飲器

索隱曰案大宛  
傳曰匈奴破月

支王以其頭為飲器裴氏注彼引韋昭云飲器裨榼也晉灼  
曰飲器虎子也皆非裨榼所以盛酒耳非用飲者晉氏以為

藝器者以韓子曰春秋並云襄子漆智伯頭為溲杯故也  
○正義曰劉云酒器也每賓會設之示恨深也按諸先儒說

非豫讓遁逃山中曰嗟乎士為知己者死女為  
說己者容今智伯知我我必為報讎而死以報  
智伯則吾魂魄不愧矣乃變名姓為刑人入宮  
塗廁中挾匕首欲以刺襄子襄子如廁心動執  
問塗廁之刑人則豫讓內持刀兵曰欲為智伯  
報仇左右欲誅之襄子曰彼義人也吾謹避之  
耳且智伯亡無後而其臣欲為報仇此天下之  
賢人也卒釋去之索隱曰卒音足律反居頃之豫讓又漆身  
為厲音類○索隱曰賴惡瘡病也凡漆有毒近之多患瘡腫若賴病然故豫讓以來漆身令其若癩耳然厲賴

刺客傳

聲相近古多假厲為賴今之癩字從才故

楚有賴鄉亦作厲字也戰國策亦作厲

曰啞音烏雅反謂瘖病戰國策云漆身為厲滅髮須去眉以變

其容為乞食人其妻曰狀兒不似吾夫何其音之甚相類也

豫遂吞炭以使其形狀不可知行乞於市其妻不識

變其音也

也行見其友其友識之曰汝非豫讓邪曰我是

也其友為泣曰以子之才委質而臣事襄子襄

子必近幸子近幸子乃為所欲顧不易邪

謂因得殺襄子顧反也邪不

定之辭反不易耶言其易也

何乃殘身苦形欲以求

報襄子不亦難乎豫讓曰既已委質臣事人而

求殺之是懷二心以事其君也且吾所為者極

難耳

索隱曰劉氏云

謂今為厲啞也

然所以為此者將以愧天下

後世之爲人臣懷二心以事其君者也

索隱曰三言寧子為厲而

自刑不可求事襄子而行殺則忠傷人臣之義而近賊非忠也

既去頃之襄子當出

豫讓伏於所當過之橋下

正義曰汾橋下架水在并州晉陽縣東一里

襄

子至橋馬驚襄子曰此必是豫讓也使人問之  
果豫讓也於是襄子乃數豫讓曰子不嘗事范  
中行氏乎智伯盡滅之而子不為報讎而反委  
質臣於智伯智伯亦已死矣而子獨何以為之  
報讎之深也豫讓曰臣事范中行氏范中行氏  
皆衆人遇我我故衆人報之至於智伯國士遇  
我我故國士報之襄子喟然嘆息而泣曰嗟乎

刺客傳

豫子子之為智伯各既成矣而寡人赦子亦已足矣子其自為計寡人不復釋子使兵圍之豫讓曰臣聞明主不掩人之美而忠臣有死名之義前君已寬赦臣天下莫不稱君之賢今日之事臣固伏誅然願請君之衣而擊之焉以致報讎之意則雖死不恨非所敢望也敢布腹心於是襄子大義之乃使使持衣與豫讓豫讓拔劍三躍而擊之

索隱曰戰國策云衣盡出血襄子迴車車輪未周而亡此不言衣出血者太史公恐

涉怪妄故略之耳

曰吾可以下報智伯矣遂伏劍自殺死

之日趙國志士聞之皆為涕泣其後四十餘年

而軹有聶政之事自三晉滅智伯至殺俠累五十七年

聶政者軹深井里人也索隱曰地理志河內有軹縣深井軹縣之里各也。正義曰在

懷州濟源縣南三十里殺人避仇與母姊如齊以屠為事久

之濮陽嚴仲子事韓哀侯索隱曰高誘曰嚴遂字仲子案表聶政殺俠累在列

侯三年列侯生文侯文侯生哀侯凡更三代哀侯六年為韓嚴所殺今言仲子事哀侯恐非其實且太史公聞疑傳疑聞

信傳信事難的據欲使兩存故表傳各異也與韓相俠累有郤索隱曰俠音

力追反案戰國策俠累各傀也傀相韓嚴遂重於君二人相害也嚴遂舉韓傀之過韓傀叱之於朝嚴遂拔劍趨之以救

解是有郤之由也嚴仲子恐誅亡去游求人可以報俠累

者至齊齊人或言聶政勇敢士也避仇隱於屠

者之間嚴仲子至門請數反然後具酒自暢徐廣

刺客傳

曰一作賜○索隱曰案戰國策作賜近為得也○正義曰數色吏反聶政母前酒酣嚴仲

子奉黃金百溢前為聶政母壽聶政驚怪其厚

固謝嚴仲子嚴仲子固進而聶政謝曰臣幸有

老母家貧客游以為狗屠可以旦夕得甘毳此

反○索隱曰鄒氏音脆二義相通也以養親親供養備不敢當仲子之

賜嚴仲子辟人因為聶政言曰臣有仇而行游

諸侯眾矣然至齊竊聞足下義其高故進百金

者將用為夫人麤糲之費正義曰糲猶麤糲米也脫粟也韋昭云古者名男子為

丈夫尊大媼為夫人漢書宣元六王傳王過夫人益誦為夫人乞骸去按夫人憲王外祖母古詩云三日斷五疋夫人故言

遲是得以交足下之驩豈敢以有求望邪聶政曰



臣所以降志辱身

索隱曰言其心志與身本應高潔今乃卑下其志屈辱其身論語孔子謂

柳下惠降志辱身是也

居市井屠者徒幸以養老母老母在

政身未敢以許人也

索隱曰禮記云父母存不許友以死

嚴仲子固讓

聶政竟不肯受也然嚴仲子卒備賓主之禮而

去久之聶政母死既已葬除服聶政曰嗟乎政

乃市井之人

正義曰古者相聚汲水有物便賣因成市故云市井

鼓刀以屠而

嚴仲子乃諸侯之卿相也不遠千里枉車騎而

交臣臣之所以待之至淺鮮矣未有大功可以

稱者而嚴仲子奉百金為親壽我雖不受然是

者徒深知政也夫賢者以感忿睚眦之意而親

信窮僻之人而政獨安得嘿然而已乎且前日  
要政政徒以老母老母今以天年終政將爲知  
己者用乃遂西至濮陽見嚴仲子曰前日所以  
不許仲子者徒以親在今不幸而母以天年終  
仲子所欲報仇者爲誰請得從事焉嚴仲子具  
告曰臣之仇韓相俠累俠累又韓君之季父也  
宗族盛多居處兵衛甚設臣欲使人刺之衆終  
莫能就今足下幸而不棄請益其車騎壯士可  
爲足下輔翼者聶政曰韓之與衛相去中間不  
甚遠

索隱曰高誘曰韓都潁川陽翟衛  
都東郡濮陽故曰相去不甚遠也

今殺人之相

相又國君之親此其勢不可以多人多人不能

無生得失

索隱曰戰國策作無生情言所將人多或生異情故語泄此云生得言將人多往殺俠累後有

被生擒而事泄亦兩俱通也

生得失則語泄語泄是韓舉國而

與仲子為讎

徐廣曰一作難○索隱曰戰國策譙周亦同

豈不殆哉遂謝

車騎人徒聶政乃辭獨行杖劍至韓韓相俠累

方坐府上持兵戟而衛侍者甚眾聶政直入上

階刺殺俠累

徐廣曰韓列侯三年三月盜殺韓相俠累俠累名傀戰國策曰有東孟孟之會又云聶

政刺韓傀兼中哀侯○索隱曰戰國策曰政直入上階刺韓傀傀走而抱哀侯聶政刺之兼中哀侯高誘云東孟地名也

左右大亂聶政大呼所擊殺者數十人因自皮

面決眼

索隱曰皮面謂以刃刺其面皮欲令人不識決眼謂出其眼睛戰國策作抉眼此決亦通音烏攷反

自屠出腸遂以死韓取聶政屍暴於市

正義暴  
蒲酷反

購問莫知誰子於是韓購縣之有能言殺相俠

累者予千金久之莫知也政姊榮

一作榮○索隱  
曰榮其姊名也

戰國策無榮字聞人有刺殺韓相者賊不得國不知其名

姓暴其尸而縣之千金乃於邑曰

索隱曰劉氏云  
煩冤愁苦也

其是吾弟與嗟乎嚴仲子知吾弟立起如韓之

市而死者果政也伏尸哭極哀曰是軼深井里

所謂聶政者也市行者諸衆人皆曰此人暴虐

吾國相王縣購其名姓千金夫人不聞與何敢

來識之也榮應之曰聞之然政所以蒙污辱自

棄於市販之間者為老母幸無恙

索隱曰爾雅云恙憂也楚詞云

還及吾君之無恙風俗通云恙病也凡人相見及通書皆云無恙又易傳云上古之時草居露宿恙齧虫也善食人心俗

悉患之故相勞云無恙恙非病也

妾未嫁也親既以天年下世妾

已嫁夫嚴仲子乃察舉吾弟困污之中

索隱曰案察謂觀察

有志行乃奉之劉氏云察猶選也

而交之澤厚矣可奈何士固為知

己者死今乃以妾尚在之故重自刑以絕從

徐廣

曰恐其姊從坐而死○索隱曰重音持用反重猶復也為人報讎死乃自以妾故復自刑其身令人不識也從音蹤古字

少假借故無足旁而徐氏以為從坐非也劉氏亦音足松反○正義曰重直龍反自刑作刑說文云刑劓也按重猶憂惜也本為嚴仲子報仇訖愛惜其事不令漏泄以絕其蹤迹其姊妾云云為己隱誤矣

妾其奈何畏

歿身之誅終滅賢弟之名大驚韓市人乃大呼

天者三卒於邑悲哀而死政之旁晉楚齊衛聞

之皆曰非獨政能也乃其姊亦烈女也鄉使政

誠知其姊無濡忍之志不重暴骸之難索隱曰

人性濕潤則能含忍故云濡忍若勇躁則必輕死也重難並如字重猶惜也言不惜暴骸之為難也必絕險

千里以列其名姊弟俱僇於韓市者亦未必敢

以身許嚴仲子也嚴仲子亦可謂知人能得士

矣其後二百二十餘年秦有荆軻之事徐廣曰耳聃政至荆軻

百七十年爾○索隱曰徐氏據六國年表而言則謂此傳率略而言二百餘年亦當時為不能細也○正義曰按年表從

始皇二十三年至韓景侯三百七十年若至哀侯六年六百四十二年

荆軻者衛人也索隱曰案贊論稱公孫季功董生為余道之則此傳雖約戰國策而亦別記異

聞其先乃齊人徙於衛衛人謂之慶卿索隱曰

人齊有慶氏則或本姓慶春秋慶封其後改姓賀此亦至衛而改姓慶爾荆慶聲相近故隨在國而異其號也卿者時人

尊重之號猶如相尊美而稱子然也而之燕燕人謂之荆卿荆卿好讀

書擊劍呂氏劍技曰持短入長倏忽從橫以術說衛元君衛元君

不用其後秦伐魏置東郡徙衛元君之支屬於

野王正義曰懷州河內縣荆軻嘗游過榆次正義并州縣也與蓋

聶論劍索隱曰蓋音古臘反蓋姓聶名蓋聶怒而目之荆軻出人

或言復乃荆卿蓋聶曰曩者吾與論劍有不稱

者吾目之試往是宜去不敢留使使往之主人

荆卿則已駕而去榆次矣使者還報蓋聶曰固

刺客傳

去也吾曩者目攝之

索隱曰攝猶整也謂不稱己意因怒視以攝整之也。正義曰攝猶

也

荆軻游於邯鄲魯句踐與荆軻博爭道

索隱曰魯姓句

踐名也與越王同或有  
意義俗本踐作賤非也

魯句踐怒而叱之荆軻嘿

而逃去遂不復會荆軻既至燕愛燕之狗屠及

善擊筑者高漸離

索隱曰筑似琴有絃用竹擊之取以為名漸音如字正義音子廉反荆

軻嗜酒日與狗屠及高漸離飲於燕市酒酣以

往高漸離擊筑荆軻和而歌於市中相樂也已

而相泣旁若無人者荆軻雖游於酒人乎

徐廣曰飲酒之

人然其為人沈深好書其所游諸侯盡與其賢

豪長者相結其之燕燕之處士田光先生亦善



待之知其非庸人也居頃之會燕太子丹質秦  
亡歸燕燕太子丹者故嘗質於趙而秦王政生  
於趙其少時與丹驩及政立爲秦王而丹質於  
秦秦王之遇燕太子丹不善故丹怨而亡歸歸  
而求爲報秦王者國小力不能其後秦日出兵  
山東以伐齊楚三晉稍蠶食諸侯且至於燕燕  
君臣皆恐禍之至太子丹患之問其傅鞠武索隱  
曰鞠音魏又如字人姓名也武對曰秦地徧天下威脅韓魏趙  
氏北有甘泉谷口之固南有涇渭之沃擅巴漢  
之饒右隴蜀之山左關穀之險民衆而士厲兵

華有餘意有所出則長城之南易水以北正義曰以北謂

燕國也

未有所定也奈何以見陵之怨欲批其逆

鱗哉

批音白結反○索隱曰批謂觸擊之

丹曰然則何由對曰請入

圖之居有間秦將樊於期得罪於秦王亡之燕

太子受而舍之鞠武諫曰不可夫以秦王之暴

而積怒於燕足為寒心

索隱曰凡人寒甚則心戰恐懼亦戰今以懼聲言寒言可為心戰

又况聞樊將軍之所在乎是謂委肉當餓虎之

蹊也禍必不振矣

索隱曰振救也言禍大而不可救也

雖有管晏不

能謂之謀也願太子疾遣樊將軍入匈奴以滅

口請西約三晉南連齊楚北購於單于

索隱曰戰國策購作

講講和也今讀購與為燕購同購合也漢史購講兩字常  
雜今言欲比與匈奴連和也陳軫傳亦曰西購於秦也 其

後迺可圖也太子曰太傅之計曠日彌久心惛

然正義曰惛音昏恐不能須臾且非獨於此也夫樊將

軍窮困於天下歸身於丹丹終不以迫於彊秦

而棄所哀憐之交置之匈奴是固丹命卒之時

也願太傅更慮之鞠武曰夫行危欲求安造禍

而求福計淺而怨深連結一人之後交不顧國

家之大害此謂資怨而助禍矣夫以鴻毛燎於

爐炭之上必無事矣且以鷓鷯之秦行怨暴之

怒豈足道哉燕有田光先生其為人智深而勇

刺客傳

沈可與謀太子曰願因太傅而得交於田先生  
可乎鞠武曰敬諾出見田先生道太子願圖國  
事於先生也田光曰敬奉教乃造焉太子逢迎  
却行爲導跪而蔽席

徐廣曰蔽一作撥一作捩索  
隱曰蔽音疋結反蔽猶拂也

田光坐定左右無人太子避席而請曰燕秦不兩  
立願先生留意也田光曰臣聞騏驥盛壯之時  
一日而馳千里至其衰老駑馬先之今太子聞  
光盛壯之時不知臣精已消亡矣雖然光不敢  
以圖國事所善荆卿可使也

正義曰燕丹子云田光  
荅曰竊觀太子客無可

用者夏扶血勇之人怒而面赤宋意脉勇之人怒而面青武  
陽骨勇之人怒而面白光所知荆軻神勇之人怒而色不變

太子曰願因先生得結交於荆卿可乎田光曰  
敬諾即起趨出太子送至門戒曰丹所報先生  
所言者國之大事也願先生勿泄也田光俛而  
笑曰諾正義曰俛音俯僂行見荆卿曰光與子相善燕  
國莫不知今太子聞光壯盛之時不知吾形已  
不逮也幸而教之曰燕秦不兩立願先生留意  
也光竊不自外言足下於太子也願足下過太  
子於宮荆軻曰謹奉教田光曰吾聞之長者爲  
行不使人疑之今太子告光曰所言者國之大  
事也願先生勿泄是太子疑光也夫爲行而使

人疑之非節俠也欲自殺以激荆卿曰願足下  
急過太子言光已死明不言也因遂自刎而死  
荆軻遂見太子言田光已死致光之言太子再  
拜而跪膝行流涕有頃而後言曰丹所以誠田  
先生毋言者欲以成大事之謀也今田先生以  
死明不言豈丹之心哉荆軻坐定太子避席頓  
首曰田先生不知丹之不肖使得至前敢有所  
道此天之所以哀燕而不棄其孤也

王尚在而丹稱孤者或記者失辭或諸侯嫡子  
時亦替稱孤也又劉向云丹燕王喜之太子

索隱曰案無父稱孤時燕  
今秦有貪

利之心而欲不可足也非盡天下之地臣海內

之王者其意不厭今秦已虜韓王盡納其地又  
舉兵南伐楚北臨趙王翦將數十萬之衆距漳  
鄴而李信出太原雲中趙不能支秦必入臣入  
臣則禍至燕燕小弱數困於兵今計舉國不足  
以當秦諸侯服秦莫敢合從丹之私計愚以爲  
誠得天下之勇士使於秦闕以重利索隱曰闕視也言以利誘  
之秦王貪索隱曰絕句其勢必得所願矣誠得劫秦  
王使悉反諸侯侵地若曹沫之與齊桓公則大  
善矣則不可因而刺殺之彼秦大將擅兵於  
外而內有亂則君臣相疑以其間諸侯得合從

其破秦必矣此丹之上願而不知所委命唯荆  
卿留意焉久之荆軻曰此國之大事也臣驚下  
恐不足任使太子前頓首固請毋讓然後許諾  
於是尊荆卿為上卿舍上舍太子日造門下供  
太牢具異物間進車騎美女恣荆軻所欲以順

適其意

索隱曰燕丹子曰軻與太子游東宮池軻拾瓦投龜太子捧金丸進之又共乘千里馬軻曰馬肝美

即殺馬進肝太子與樊將軍置酒於華陽其室出美人能鼓琴軻曰好手也斷以玉盤盛之軻曰太子遇軻甚厚是也

之荆軻未有行意秦將王翦破趙虜趙王盡收  
入其地進兵北略地至燕南界太子丹恐懼乃  
請荆軻曰秦兵旦暮渡易水則雖欲長侍足下



豈可得哉荆軻曰微太子言臣願謁之今行而  
毋信則秦未可親也夫樊將軍秦王購之金千  
斤邑萬家誠得樊將軍首與燕督亢之地圖徐廣  
曰方城縣有督亢亭駟案劉向別錄曰督亢膏腴之地○索隱曰地理志廣陽國有薊縣司馬彪郡國志曰薊縣方城有督亢亭徐說是也○正義曰督亢坡在幽州范陽縣東南十里今固安縣南有督亢陌幽州南界奉獻秦  
王秦王必說見臣臣乃得有以報太子曰樊將  
軍窮困來歸丹丹不忍以己之私而傷長者之  
意願足下更慮之荆軻知太子不忍乃遂私見  
樊於期曰秦之遇將軍可謂深矣父母宗族皆  
為戮沒今聞購將軍首金千斤邑萬家將奈何

刺客傳

於期仰天太息流涕曰於期每念之常痛於骨  
髓顧計不知所出耳荆軻曰今有一言可以解  
燕國之患報將軍之仇者何如於期乃前曰為  
之奈何荆軻曰願得將軍之首以獻秦王秦王  
必喜而見臣臣左手把其袖右手搃其匈徐廣曰搃

音張鳩切一作抗○索隱曰搃謂以劔刺其匈也抗音苦浪反言抗拒也其義非然則將軍之

仇報而燕見陵之愧除矣將軍豈有意乎樊於

期偏袒搃掩而進徐廣曰掩一作搃○索隱曰搃音烏革反掩音烏亂反字書作寧掌後曰

腕勇者奮厲必先以左手扼右腕也曰此臣之日夜切齒腐心也索隱曰切

齒齒相磨切也爾雅曰治骨曰切府音輔府肉亦爛也猶今人事不可忍云府肉爛然比日奮怒之意乃今得聞

教遂自剄太子聞之馳往伏屍而哭極哀既已

不可奈何乃遂盛樊於期首函封之於是太子

豫求天下之利匕首得趙人徐夫人匕首徐廣曰徐一作

陳○索隱曰徐姓夫人名謂男子也取之百金使工以藥焯之索隱曰焯染也

音忽遺反謂以毒藥染劍鏑也以試人血濡縷人無不立死者言

匕首試人人血出足以沾濡絲縷便立死也乃裝為遣荆卿燕國有勇士

秦舞陽年十三殺人人不敢忤視索隱曰忤者逆也音五故反不

敢逆視言人畏之甚也乃令秦舞陽為副荆軻有所待欲與

俱其人居遠未來而為治行頃之未發太子遲

之疑其改悔乃復請曰日已盡矣荆卿豈有意

刺客傳

哉丹請得先遣秦舞陽荆軻怒叱太子曰何太子之遣往而不反者豎子也且提匕首入不測之彊秦僕所以留者待吾客與俱今太子遲之請辭決矣遂發太子及賓客知其事者皆白衣冠以送之至易水之上既祖取道

正義曰易州在幽州歸義

縣界高漸離擊筑荆軻和而歌爲變徵之聲

正義曰徵

知雉反

士皆垂淚涕泣又前而歌曰風蕭蕭兮易

水寒壯士一去兮不復還復爲羽聲愴慨士皆

瞋目髮盡上指冠於是荆軻就車而去終已不

顧遂至秦持千金之資幣物厚遺秦王寵臣中

庶子蒙嘉嘉為先言於秦王曰燕王誠振怖大  
 王之威不敢舉兵以逆軍吏願舉國為內臣比  
 諸侯之列給貢職如郡縣而得奉守先王之宗  
 廟恐懼不敢自陳謹斬樊於期之頭及獻燕督  
 亢之地圖函封燕王拜送于庭使使以聞大王  
 唯大王命之秦王聞之大喜乃朝服設九賓正義  
曰劉云設文物大備即謂九賓不得以周禮九賓義為釋見燕使者咸陽宮正義  
輔黃圖云秦始皇兼天下咸陽因北陵營宮殿制紫宮象帝居渭水貫都以象天漢橫橋南度以法牽牛也荆軻  
 奉樊於期頭函而秦舞陽奉地圖匣以次進索隱  
曰匣音戶甲反匣亦函也至陞秦舞陽色變振恐羣臣怪之荆

刺客傳

軻顧笑舞陽前謝曰北蕃蠻夷之鄙人未嘗見  
天子故振惛願大王少假借之使得畢使於前  
秦王謂軻曰取舞陽所持地圖軻既取圖奏之  
秦王發圖圖窮而匕首見因左手把秦王之袖  
而右手持匕首揜之未至身秦王驚自引而起  
袖絕拔劔劔長操其室

索隱曰室謂鞘也○正義曰  
燕丹子云左手揜其胷秦王

曰今日之事從子計耳乞聽琴而死召媼人鼓琴琴聲曰羅  
縠單衣可裂而絕八尺屏風可超而越鹿盧之劍可負而拔

王於是奮袖  
超屏風走之時惶急劔堅故不可立拔荆軻逐秦

王秦王環柱而走羣臣皆愕卒起不意盡失其  
度而秦法羣臣侍殿上者不得持尺寸之兵諸

郎中執兵皆陳殿下索隱曰諸郎中若今宿衛之官非有詔召不

得上方急時不及召下兵以故荆軻乃逐秦王

而卒惶急無以擊軻而以手共搏之是時侍醫

夏無且索隱曰且音即餘反以其所奉藥囊提荆軻也正義曰提姪帝

秦王方環柱走卒惶急不知所為左右乃曰

王負劍索隱曰王劭曰古者帶劍上長拔之不出室欲王推之於背今前短易拔故云王負劍負

劍遂拔以擊荆軻斷其左股荆軻廢乃引其匕

首以擲秦王索隱曰擲與擲同古字耳音持益反不中中銅柱正義曰燕丹太子云

秦王復擊軻軻被八創軻自知

事不就倚柱而笑箕倨以罵曰事所以不成者

刺客傳

以欲生劫之必得約契以報太子也漢鹽鐵論曰荆軻懷數年

之謀而事不就者尺八寸不足恃也秦王操於不意列幽冀育者介七尺之利也於是左右既

前殺軻秦王不怡者良久已而論功賞羣臣及

當坐者各有差而賜夏無且黃金二百溢曰無

且愛我乃以藥囊提荆軻也於是秦王大怒益

發兵詣趙詔王翦軍以伐燕十月而拔薊城燕

王喜太子丹等盡率其精兵東保於遼東秦將

李信追擊燕王急代王嘉乃遺燕王喜書曰秦

所以尤追燕急者以太子丹故也今王誠殺丹

獻之秦王秦王必解而社稷幸得血食其後李



信追丹丹匿銜水中索隱曰水名在遼東燕王乃使使斬太

子丹欲獻之秦秦復進兵攻之後五年秦卒滅

燕虜燕王喜其明年秦并天下立號為皇帝於

是秦逐太子丹荆軻之客皆亡高漸離變名姓

為庸保匿作於宋子徐廣曰縣名也今屬鉅鹿○索隱曰樂布傳曰賣庸於齊

為酒家人漢書作酒家保案謂庸作於酒家言可保信故曰庸保鷓冠子曰伊尹酒保也徐注云宋子縣名屬鉅鹿者據地理志而知也○正義曰宋子故城在邢州平鄉縣北三十里久之作苦聞其家堂上

客擊筑傍徨不能去每出言曰彼有善有不善

從者以告其主索隱曰謂主人家之左右也曰彼庸乃知音竊

言是非家丈人召使前擊筑索隱曰劉氏云謂主人翁也又韋昭云古

刺客傳

者男子為丈夫尊父嫗為丈人故漢書宣元六王傳所云丈人謂淮陽憲王外王母即張博母也故古詩云三日斷五疋

丈人故言遲是也

一坐稱善賜酒而高漸離念久隱畏約

無窮時

索隱曰約謂貧賤儉約既為庸保常畏人故云畏約所以論語云不可與久處約也

乃退

出其裝匣中筑與其善衣更容貌而前舉坐客

皆驚下與抗禮以為上客使擊筑而歌客無不

流涕而去者宋子傳客之

徐廣曰互以為客

聞於秦始皇

秦始皇召見人有識者乃曰高漸離也秦皇帝

惜其善擊筑重赦之乃矐其目

矐音海各反○索隱曰一立音角說者云以

馬杲燠令失明

使擊筑未嘗不稱善稍益近之高漸離

乃以鉛置筑中

索隱曰案劉氏云以鉛為挺著筑中令重以擊人

復進得近

舉筑朴秦皇帝

索隱曰朴音普  
上反朴擊也

不中於是遂誅高

漸離終身不復近諸侯之人魯勾踐已聞荆軻

之刺秦王私曰嗟乎惜哉其不講於刺劍之術

也

索隱曰案不講  
謂不論習之

甚矣吾不知人也曩者吾叱之

彼乃以我為非人也

太史公曰世言荆軻其稱太子丹之命天雨粟

馬生角也

索隱曰燕丹求歸秦王曰烏頭白馬生角乃許  
耳丹乃仰天歎烏頭即白馬亦生角風俗通及

論衡皆有此說仍云  
既門木鳥生肉足也

太過又言荆軻傷秦王皆非也

始公孫季功董生與夏無且游具知其事為余

道之如是自曹沫至荆軻五人此其義或成或

不成然其立意較然索隱曰較明也不欺其志名垂後世  
豈妄也哉

索隱述贊曰

曹沫盟柯 返魯侵地 專諸進炙

定吳篡位 彰弟哭市 報主塗廁

刎頸申冤 操袖行事 暴秦奪魄

懦夫增氣

刺客列傳第二十六

史記八十六

刺客傳